

萬 有 文 庫

第一集一千種

王 雲 五 主 編

白 香 山 集

(八)

白 居 易 著

商 務 印 書 館 發 行





THE
MUSEUM OF
ART AND HISTORY
OF THE CITY OF
NEW YORK

THE
MUSEUM OF
ART AND HISTORY
OF THE CITY OF
NEW YORK

THE
MUSEUM OF
ART AND HISTORY
OF THE CITY OF
NEW YORK



白香山集

(八)

白居易著

國學基本叢書

白香山集

卷五十

判 五十道

得丁上言豪富人畜奴婢過制。請據品秩爲限約。或責其越職論事。不伏。

品秩異倫。咸獲有數。苟踰等列。是紊典常。丁志在作程。惡夫過制。爰陳誠於白奏。俾知禁於素封。將使豪富之徒。資雖積於鉅萬。僮僕之限。數無踰於指千。抑淫義叶於隋時。革弊道符於漢日。責其論事。無乃失辭。若守職以越思。則爲出位。將盡忠於陳計。難伏嘉言。楚旣失之。鄭有辭矣。

得甲爲邠州刺史。正月。令人修耒耜。廉使責其失農候。訴云。土地寒

教有權節。業無易宜。地苟異於寒溫。農則殊於早晚。甲分憂率職。從俗勉人。天時有常。農宜先定。地氣不類。寒則晚成。雖愆揉木之時。未建把草之候。正惟廉使。何昧遺風。縱稼器之已修。先成焉用。苟土膏之不起。欲速何爲。誠宜嘉乃辨方。豈可詰其行古。循諸周禮。修耒雖在於季冬。訓此豳人。于耜未乖於正月。責則迂也。訴之宜哉。

得乙掌宿息井樹。賓至不誅。相翔者。御史糾之。辭云。罪在守塗之人。

姦或不誅。吏將焉用。苟欲科其官失。必先辨以司存。乙慎守無聞。庀徒有怠。嘉賓戾止。誠宜慮以相翔。暴客聿來。固合擒而勿佚。旣墮官禁。是縱公行。且戒事之前。不申嚴於聚攬。慢官之後。欲移過於守塗。誠乖

率屬之方。宜甘責帥之罰。然以官雖聯事。等列或殊。罪不同科。重輕宜別。比夫所屬。請以異論。

得景爲私客。擅入館驛。欲科罪。辭云。雖入未供。

傳舍是崇。使車攸處。將供行李。必辨公私。何彼客遊。欲從公食。豈無逆旅。宜受饋於盤飧。既匪使臣。何苟求於館穀。信饗饗而是啓。寧僭濫之可容。同周官之慮。入宜銜命。非鄭氏之驛。置豈延賓。法旣自干。咎將誰任。然則不應入而妄入。刑固難逃。而已供與未供。罪宜有別。請從減降。庶叶科條。

得洛水暴漲。吹破中橋。往來不通。人訴其弊。河南府云。雨水猶漲。未可修橋。縱苟施功。水來還破。請待水定。人又有辭。

大水爲災。中橋其壞。車徒未濟。誠有阻於往來。修造從宜。亦相時之可否。顧茲浩浩。阻彼憧憧。人訴川梁不通。壅而爲弊。府慮水沴。荐至。毀必重勞。苟後患之不圖。則前功之盡棄。將思濟衆。固合俟時。徵啓塞之文。雖必資於一日。防懷襄之害。未可應乎七星。無取人辭。請依府見。

得景爲將。敵人遺之藥。景受而飲之。或責失人臣之節。不伏。

軍尙隱情。臣宜守道。况幄中權之要。當絕外交之嫌。景受命建牙。遇敵飲藥。直雖可舉。忠則不知。且事君在公。訓旅貴信。失人臣之節。爾豈目明。惑士卒之心。吾將安仰。况兵惟尙詐。人不易知。同饋醪而無他。推誠猶可。苟毒流而不察。雖悔寧追。無謀旣昧。三思不伏。恐涉貳過。勿疑以飲。徒徇陸抗之名。未達而嘗。且墜宜尼之訓。是違師律。難償鄰言。

得丁將在別屯。士卒有犯。每專殺戮。御史舉劾。訴稱曾受棨戟之賜。

將非處右莫敢示威。軍或別屯。則宜專命。丁位雖佐理。分以戎行。執專征之權。錫弓於周典。操司獄之柄。受繁於漢儀。既有令而必行。信無瑕而可戮。實握兵之能政。奚執簡之舉違。如或稟命於連營。畏予不敢。今則分部而賜戟。無我有違。宜崇魏絳之威。勿議秦彭之罪。

得甲告老。請立長爲嗣。長辭云不能。請讓其弟。或詰之云。弟好仁。

讓賢雖仁。廢長非順。徒聞建善則理。其如亂嗣不祥。甲告老於朝。立子爲後。雖急難自舉。必有可觀者焉。而長幼以倫。無所苟而已矣。况欲正其爵位。豈宜越以鴈行。於弟克恭厥兄。徒見好仁之請。知子莫若於父。蓋從立長之言。無忌雖欲傳家。季札終當棄室。諒可致詰。罔聽不能。

得乙出妻。妻訴云。無失婦道。乙云。父母不悅。則出。何必有過。

孝養父母。有命必從。禮事舅姑。不悅則出。乙親存爲子。年壯有妻。兆啓和鳴。授室之儀。雖備。德非柔淑。宜家之道。則乖。若無爽於聽從。曷見尤於譴怒。信傷婉婉。理合怛離。且聞莫慰母心。則宜去矣。何必有虧婦道。然後棄之。未息游詞。請稽往事。姜詩出婦。蓋爲小瑕。鮑永去妻。亦非大過。明徵斯在。薄訴何爲。

得景有姊之喪。合除而不除。或非之。稱吾寡兄弟。不忍除也。

喪雖寧戚。禮且節哀。俾不足與有餘。必跂及而俯就。景愛深血屬。禮過時制。與鮮兄之歎。情既鍾於孔懷。及居姊之喪。服將除而不忍。雖志崇敦睦。而事越典彝。况儀貴適中。哀不在外。宜抑情而順變。多奚以爲。苟在禮而或踰。過猶不及。請遵仲尼之訓。無執季路之辭。

得丁陷賊庭。守道不仕。賊帥逼之。辭云。堯舜在上下。有巢許。遂免。所司欲旌其節。大理執不許。

臣節貴忠。國經懋賞。宜遵善道。難廢彝章。丁陷在賊庭。強其祿仕。敦在三之義。因時難而名聞。守無二之忠。經歲寒而節見。逼夷齊以周粟。引巢許於唐臣。身以道存。情非利動。所當厚獎。何乃深疑。且人無不臣之心。所謂順也。邦有惟重之典。其可廢乎。從亂則必論辜。守道豈無旌善。野哉大理。信乃執迷。展矣所司。誠爲勸沮。

得景爲大夫有喪。丁爲士而特弔。或責之。不伏。

官有常尊。禮無不敬。位若殊於等列。弔則異其節文。景爲大夫。丁乃元士。居喪而哭。合遵朝夕之期。特弔以行。奚越尊卑之序。既乖前典。乃速斯言。且禮貴明徵。位宜慎守。俟非其事。信于食菜之榮。儀失其宜。徒展贈葛之意。是曰無上。將何以觀。

得吏部選人入試。請繼燭以盡精思。有司許之。及考其書判善惡。與不繼燭同。有司欲不許。未知可否。

旁求俊造。迨將筮仕。歷試文辭。俾從卜夜。苟狂簡而無取。宜確執而勿聽。萃彼羣才。登於會府。惟賢是急。慮失寶於握珠。有命則從。許借光於秉燭。及乎考覈。罕有菁英。屬辭旣謝於揀金。待問徒煩於繼火。將期百鍊之後。思苦彌精。何意一場之中。心勞逾拙。曷如早已。焉用晚成。敢告有司。勿從所請。

得乙貴達有故人至。坐於堂下。進以僕妾之食。或謂之。乙曰。恐以小利而忘大名。故辱而激之也。貴賤苟合。曾是汎交。窮達相致。乃爲執友。乙旣登貴仕。爰有故人。以爲念舊追歡。知己之心未至。行權勵節。成人之美則多。不登夫子之堂。乃進僕人之食。苟推誠而相激。雖屈辱以何傷。安實敗名。重耳竟慚於

子犯感而成事。張儀終謝於蘇君。是勉後圖。且符往行。如或識纒半面。契未同心。雖發憤以達人。必取怨於謗己。以斯致諂。亦謂合宜。

得景領縣。府無蓄廩。無儲管郡。詰其慢職。景云。王者富人。藏於天下。故也。

賦斂異宜。君臣殊政。藏諸百姓。在王者而則然。虛我千倉。於職司而不可。景匱茲國用。豐彼家財。人不誅求。誠爲寬政。府無儲蓄。寧匪慢官。况今征稅有常。公私兼濟。苟能取之以道。則下自樂輸。何必藏之於人。使上將乏用。既爽奉公之節。宜甘掠美之科。罔縱縣辭。請依郡詰。

得丁食於喪者之側而飽。或責之。辭云。主人食我以禮。故飽。

飲食以陳。庶無求飽。齋衰可恤。仁豈忘情。丁靡念人喪。始求主禮。遇加籩之膳。誠可療飢。對泣血之哀。亦宜忘味。既念吉蠲之饋。是忘惻隱之心。况春於其隣。相猶違禮。而食於其側。飽亦非仁。徒嘉施氏之儀。且味宜尼之教。勿思變色。當顧戚容。

得甲爲獄吏。囚走限內。他人獲之。甲請免罪。

圖土不嚴。罪人其遁。亡而由己。誠曰慢官。獲則因人。其何補過。相維彼甲。所謂攸司。不念恪居。傲於羨里。旋聞失守。逸乃楚囚。雖非故縱。所爲曾是慢常。而致徒稱勿佚。未可塞違。得於他人。自是疎網無漏。失其所職。豈可出匣不科。無貪假手之功。固合甘心於罰。

得乙川游。所由禁之。云有故要渡。

示衆知防。必修水禁。救人鮮死。無縱川游。乙行險不思。憑河無悔。慕呂梁之術。習於浮水。違周官之令。忘

彼危身。將不弔。而是虞。雖有故而宜禁。忘子產喻政。爾則狎而翫之。引仲尼格言。吾恐蹈而死者。既殊利涉。當戒善游。未可加刑。且宜知懼。

得景爲將。每軍休止。不繕營部。監軍使劾其無備。辭云。有警。軍陣必成。何必勞苦。

將苟有謀。勞而後逸。師不用律。減亦爲凶。况未靖方隅。尙勤征伐。卽戎推轂。旣崇四七之名。臨敵屯營。何乖什伍之列。是使人慢。孰謂戎昭。簿威雖欲恤勞。徹警恐爲懈怠。且有嚴有翼。猶奪先人之心。不備不虞。寧救長蛇之尾。必也權能制勝。謀必出奇。亦待臨事有成。然後斯言可信。監軍之劾。舉未失中。彼景之辭。試可乃已。

得丁乘車。有醉吐車茵者。丁不科而吏請罪之。丁不許。

克寬克仁。所謂易事。不知不愠。是曰難能。况乎醉起。甕間嘔盈車上。小人沉湎。自貽誚於彼昏。君子含弘。乃忘情於斯怒。宥過所宜無大。知非庶使有慚。未乖觀過之仁。雅叶諦思之義。且恕當及物。察貴用情。絕纓繼淫。醉而猶捨吐茵及亂。誤豈不容。無從下吏之規。庶叶前賢之美。

得甲牛。乙馬死。請償馬價。甲云。在放牧處相舐。請賠半價。乙不伏。

馬牛於牧。蹄角難防。苟死傷之。可徵。在故誤而宜別。况日中出入。郊外寢訛。旣品量以齊驅。或風逸之相及。爾牛孔阜。奮駢角而莫當。我馬用傷。蜿駿足而致斃。情非故縱。理合誤論。在皂棧以來。思罰宜惟重。就桃林而招損。償則從輕。將息訟端。請徵律典。當賠半價。勿聽過求。

得景娶妻三年無子。舅姑將出之。訴云歸無所從。

承家不嗣。禮許此雖。去室無歸。義難棄背。景將崇繼代。是用娶妻。百兩有行。既啓飛鳳之兆。三年無子。遂操別鵠之音。將去舅姑。終鮮親族。雖配無生育。誠合比於斷絃。而歸靡適從。庶可同於束蘊。固難効於牧子。宜自哀於鄧攸。無抑有辭。請從不去。

得丁喪親。賣宅以奉葬。或責其無廟。云貧無以爲禮。

慎終之道。必信必誠。死葬之儀。有豐有省。諒欲厚於卜宅。亦難輕於慮居。丁昊天降凶。遠日叶吉。思葬具之豐備。欲祔九原。顧家徒之屢空。將鬻三畝。愛雖深於送死。義且涉於傷生。念顏氏之貧。豈宜厚葬。覽子游之問。固合稱家。禮所貴於從宜。孝不在於益侈。盍伸破產之禁。以避無廟之嫌。

得甲之周親執工伎之業。吏曹以甲不合仕。甲云。今見修改。吏曹又云。雖改仍限三年後聽仕。未知合否。

業有四人。職無二事。如或居肆。則不及仕門。甲爰有周親。是稱工者。方恥役以事上。且思祿在其中。有慕九流。雖欲自遷其業。未經三載。安可同升諸公。難違甲令之文。宜守吏曹之限。如或材高拔俗。行茂出羣。豈唯限以常科。自可登乎大用。以斯而議。誰曰不然。

得乙請用父蔭。所司以贈官降正官蔭一等。乙云。父死王事。合與正官同。

官分正贈。蔭別品階。如酬死繼之勳。則厚賞延之寵。追思乙父。勵乃臣節。捐軀致命。尙克底定爾功。繼代勸能。豈忘勤恤我後。椒聊既稱有實。桃李未可無陰。忠且忘身。優宜及嗣。如或病捐館舍。贈官當合降階。今則死衛國家。敍蔭所宜同正。庶旌義烈。用叶條章。

得景爲錄事參軍。刺史有違法事。景封狀奏聞。或責其失事長之道。景云不敢不忠於國。守位居常。小宜事大。持法舉正。卑可糾尊。景名署外臺。身由中立。直而自守。郡郵之政必行。明不相蒙。州將之邪無隱。且六條枉撓。百事滋昏。苟不提綱。是爲漏網。雖舉違犯上。虧敬長之小心。而陳奏盡忠。得事君之大節。既非下訕。難抑上聞。

得丁私發制書。法司斷依漏洩坐。丁訴云非密事。請當本罪。

君命是專。刑其無小。王言非密。罪則從輕。丁乃攸司。屬當行下。不慎厥德。擅發如綸之言。自災於身。難求疎網之漏。然則法通加減。罪有重輕。必也志在私行。唯當專達之責。如或事關樞密。則科漏洩之辜。請驗跡於紫泥。方定刑於丹筆。

得甲爲所由稽緩制書。法直斷合徒一年。訴云違未經十日。

王命急宣。行無停晷。制書稽緩。罪有常刑。將欲正其科繩。必先揆以時日。甲懈位敗度。慢令速尤。蓄怠棄之心。既虧臣節。蹙駿奔之命。自犯國章。然則審時勾稽。考程定罪。法直以役當其月。所由以違未浹辰。將計年以斷徒。恐乖閱實。請據日而加等。庶叶公平。是曰由文。俾乎息訟。

得乙盜買印用。法直斷以偽造論。訴云所由盜賣。因買用之。請減等。

賄以公行。印惟盜用。罪之大者。法可逃乎。伊人無良。同惡相濟。所由既敗官爲墨。予取予求。彼乙乃竊器成姦。不畏不入。潛謀斯露。竊弄難容。猶執薄言。將求未減。用因於買。比自作而雖殊。情本於奸。與偽造而何異。以茲降等。誠恐利淫。

得有聖水出飲者。日千數。或謂僞言。不能愈疾。且恐爭鬪。請禁塞之。百姓云。病者所資。請從人欲。執禁之要。在乎去邪。爲政之先。必也無訟。越彼泉水。流于道周。飲瓢之人。孔多。蔑聞病間。濫觴之源。不足必起爭端。訟所由生。欲不可縱。上善未能利物。左道足以惑人。且稽以祥符。徵之時事。地不藏寶。當今自出醴泉。天之愛人。從古未聞。聖水無聽虛誕之說。請塞訛僞之源。

得景有志行。隱而不仕。爲郡守所辟。稱是巫家。不當選吏。功曹按其詭詐。景不伏。

鳴鶴處陰。聲聞于外。玄豹隱霧。樂在其中。此將適於退藏。彼何強之維繫。景業敦道行。志薄宦情。太守以舉爾所知。將申蒲帛之聘。夫子以從吾所好。不顧弓旌之招。懼俗吏之徒勞。引巫家以自穢。冀其言遜。獲免。翻以行詐論辜。况商洛拂衣。漢且求之不得。潁川洗耳。堯亦存而勿論。天子尚不違情。功曹如何按罪。得丁爲刺史。見冬涉者哀之。下車以濟之。觀察使責其不順時修橋。以徼小惠。丁云。恤下。

津梁不修。何以爲政。車服有命。安可假人。丁職是崇班。體非威重。輕漢臣之寵。失位於高車。徇鄭相之名。濟人於大水。志雖恤下。道昧叶中。與其熊軾涉川。小惠未遍。曷若虹橋通路。大道甚夷。啓塞旣闕於日修。揭厲徒哀其冬涉。事關失政。情近沽名。宜科十月不成。庶辨二天無政。

得甲告其子行盜。或謂其父子不相隱。甲云。大義滅親。

法許原情。慈通隱惡。俾恩流於下。亦直在其中。甲忝齒人倫。忍傷天性。義方失教。曾莫愧於父頑。攘竊成姦。尚不爲其子隱。道旣虧於庭訓。禮遂闕於家肥。且情比樂羊。可謂不慈。傷教。况罪非石厚。徒云大義滅親。是及情所宜致諫。

得州府貢士。或市井之子孫。爲省司所詰。申稱羣萃之秀出者。不合限以常科。惟賢是求。何賤之有。况士之秀者。而人其捨諸。惟彼郡貢。或稱市籍。非我族類。則嫌雜以蕭蘭。舉爾所知。安得棄其翹楚。誠其惡於稗敗。諒難捨其茂異。揀金於砂礫。豈爲類賤而不收。度木於澗松。寧以地卑而見棄。但恐所舉失德。不可以賤廢人。况乎識度冠時。出自牛醫之後。心計成務。擢於賈豎之中。在往事而足徵。何常科而是限。州申有據。省詰非宜。

得乙充選人職官。選人代試。法司斷乙與代試者同罪。訴云實不知情。

官擇賢良。選稽名實。苟作僞而心拙。必代斲而手傷。乙情非容姦。行乖周慎。將如吾面。遂充職以不疑。未見子心。果代試而有悔。旣彰聞而貽戚。乃連坐以論辜。察情諒不同謀。結罪誠應異罰。法無攸赦。選者當准格論。人不易知。職官所宜情恕。削奪恐爲過當。貶降庶叶決平。

得甲與乙爵位同。甲以齒長。請居乙上。乙以皇宗。不伏在甲下。有司不能斷。

庠序辯儀。則先長長。朝廷列位。必尙親親。惟彼周行。是名同位。德非心競。禮失肩隨。甲以桑榆年高。何以卑我。乙以葛藟族貴。奚獨後予。各興爭長之辭。遂昧常尊之位。然禮經尙齒。且王室貴親。晉鄭同儕。信高卑之或等。滕薛異姓。諒先後之可知。難遵少長之倫。宜守親疎之序。

得選舉司取有名之士。或云不息馳驚。恐難責實。

聲雖非實。善豈無名。不可苟求。亦難盡棄。屬時當仄席。任重掄材。思得士於聲華。懼誘人於奔競。若馳驚而方取。慮非歲貢之賢。如寂寥而後求。恐失日彰之善。將期撫實。必在研精。但取捨不私。是開乎公道。則

吹噓無益。自閉其倖門。名勿論於有無。鑒自精於舉措。

得太學博士教胄子。毀方瓦合。司業以非訓導之本。不許。

教惟馴致。道在曲成。將遜志以樂羣。在毀方而和衆。况化人由學。成性因師。雖和光以同塵。德終不雜。苟圓鑿以方柄。物豈相容。道且尙於無隅。義莫先於不闕。司業以訓導貴別。或慮雷同。學官以容衆由寬。何傷瓦合。教之未墜。蓋宣尼之言然。文且有徵。則戴氏之典在。將勸學者所宜踴之。

得甲居家。被妻毆笞之。鄰人告其違法。縣斷徒三年。妻訴云非夫告不伏。

禮貴妻柔。則宜禁暴。罪非夫告。未可麗刑。何彼無良。於斯有怒。三從罔敬。待以庸奴之心。一杖所加。辱於女子之手。作威信傷於婦道。不告未爽於夫和。招訟於鄰。誠愧聲聞於外。斷徒不伏。未乖直在其中。雖昧家肥。難從縣見。

得乙居家。理廉使舉請授官。吏部以無出身不許。使執云。行成於內。可移於官。

調選正名。誠宜守序。敷求懋德。安可拘文。乙積行於中。闡彰於外。廉使以道敦知己。欲致我於青雲。天官以限在出身。將棄予於白屋。事雖異見。理可明徵。掄瑣瑣之材。則循舊格。刈翹翹之楚。寧守常科。幸當仄席之求。無感刻舟之執。况自家刑國。移孝入忠。既聞道不虛行。足見舉非失德。所宜堅決。無至深疑。

得景定婚訖。未成。而女家改嫁。不還財。景訴之。女家云無故三年不成。

義敦好合。禮重親迎。苟定婚而不成。雖改嫁而無罪。景謀將著代禮及問名。二姓有行。已卜和鳴之兆。三年無故。竟愆嫵婉之期。桃李恐失於當年。榛栗遂移於他族。既聞改適。乃訴納徵。揆情而嘉禮自虧。在法

而聘財不返。女兮不爽。未乖九十之儀。夫也無良。可謂二三其德。去禮逾遠。責人斯難。

得丁爲大夫。與管庫士爲友。或非之。云非交利也。

見賢不稱。且虧事上之節。非義苟合。則涉躐下之嫌。丁貴乃立家。友其管庫。不思進善。徒務降尊。若接而或非。自貽交利之責。儻知而不舉。則速蔽賢之尤。既未覈於是非。故欲紊乎貴賤。况公叔薦士。家臣尙見同升。雖文字好能。管庫不聞爲友。信乖慎守。宜及或非。

得四軍帥令禁兵於禁街中種田。御史劾以無勅文。辭云因循歲久。且有利於軍。

爲國勸農。田疇有制。示人知禁。衢路攸先。瞻彼三農。藝斯五稼。且叮囑是務。豈是瞻軍。雖轍迹不加。未爲曠土。輦穀必資於平易。康莊難縱以荒蕪。務有畔之農。秋成而利亦蓋寡。侵如砥之道。歲久而弊則滋多。請論環衛之非。式表鐵冠之効。

得甲爲郡守。部下漁色。御史將責之。辭云未授官已前納采。

諸侯不下。用戒淫風。君子好求。未乖婚義。甲旣榮爲郡。且念宜家。禮未及於結褵。責已加於執憲。求娶於本部之內。雖處嫌疑。定婚於授官之前。未爲縱欲。况禮先納采。足明嫵婉之求。聘則爲妻。殊非強暴之政。宜聽卑旗之訴。難科漁色之辜。

得乙爲三品。見本州刺史不拜。或非之。稱品同。

桑梓攸重。必在恪恭。官品斯同。則宜抗禮。乙班榮是踐。威重可觀。况衣錦還鄉。已崇三品之秩。雖剖符臨郡。應無再拜之儀。豈以州里版圖。而紊邦家典制。如或商周不敵。敢不盡禮事君。今且晉鄭同儕。安得降

階卑我。既不愆素。何恤或非。

得景爲獸人。冬不獻狼。責之。訴云。秦地無狼。

鮮或不給。旣曠乃官。辭且無徵。是重而罪。景獸人斯掌。禽獻罔供。當路可求。曾不思於靈尾。充庖爲用。遂有闕於去腸。旣愆冬獻之期。難償西鄰之責。載詳地產。重振國章。薦必以時。吾能言於周。有生靡常。所子勿謂其秦無。縱口給之不慚。在面欺而無捨。

得景負丁財物。丁不告官。強取財物過本數。縣司以數外。賊論之。不伏。

人縱於貪動而生悔。物非其道。取則有賊。丁放利欲贏。景逋債未償。懷不忌而強取。姑務豐財。逞無厭之過求。豈非黷貨。情難容於強暴。法必禁以奪攘。以交易而求多。尙宜准盜。在倍稱而過數。孰謂非賊。若以律論。當從縣斷。

得乙請襲爵。所司以乙除喪十年而後申請。引格不許。乙云有故。不伏。

爵命未墜。嗣襲有期。在紀律而或愆。當職司而宜舉。乙舊德將繼。新命未加。所宜纂彼前修。相承以一子。何乃廢其後嗣。自棄於十年。歲月旣已滋深。公侯固難必復。然以法通議事。理貴察情。如致身於宴安。則宜奪爵。若居家而有故。尙可策名。須待畢辭。方期析理。

得丁爲士。葬其父用大夫禮。或責其僭。辭云從死者。

禮惟辨貴。孝不貶親。是謂奉先。孰云僭上。丁慶加一命。憂及三年。凶降昊天。且結茹荼之痛。吉從遠日。方追食菜之榮。旣貴賤之殊宜。亦父子之異道。同曾元易簣。正位於大夫。殊晏嬰遺車。見非於君子。未爽慎。

終之義。允符從死之文。辭則有徵。責之非當。

得甲將死。命其子以嬖妾爲殉。其子嫁之。或非其違父之命。子云不敢陷父於惡。觀行慰心。則稟父命。辨惑執禮。宜全子道。甲立身失正。沒齒歸亂。命子以邪。生不戒之。任色愛妾爲殉。死而有害於人。違則棄言。順爲陷惡。三年之道。雖奉先而無改。一言以失。難致親於不義。誠宜嫁是。豈可順非。况孝在慎終。有同勳顯。理命事殊。改正未傷。莊子難能。宜忘在耳之言。庶見因心之孝。

卷五十一

後序

前三年。元微之爲予編次文集而敘之。凡五帙。每帙十卷。訖長慶二年冬。號白氏長慶集。邇來復有格詩律詩碑誌序記表贊以類相附。合爲卷軸。又從五十一以降。卷而第之。是時大和二年秋。予春秋五十有七。目昏頭白。衰也久矣。拙音狂句。亦已多矣。由茲而後。宜其絕筆。若餘集未盡。時時一詠。亦不自知也。因附前集報微之。故復序於卷首云爾。

格詩歌行雜體 凡五十七首

郡齋旬假命宴呈座客示郡寮 從此後蘇州作

公門日兩衙。公假月三旬。衙用決簿領。旬以會親賓。公多及私少。勞逸常不均。况爲劇郡長。安得閑宴頻。下車已三月。開筵始今晨。初黔軍廚突。一拂郡榻塵。既備獻酬禮。亦具水陸珍。萍醅箬溪醕。水鱸松江鱗。

侑食樂懸動。佐饌妓席陳。風流吳中客。佳麗江南人。歌節點隨袂。舞香遺在茵。清奏凝未闕。酩顏氣已春。衆賓勿遽起。郡寮且逡巡。無輕一日醉。用犒九日勤。微彼九日勤。何以治吾民。微此一日醉。何以樂吾身。

題西亭

朝亦視簿書。暮亦視簿書。簿書視未竟。蟋蟀鳴座隅。始覺芳歲晚。復嗟塵務拘。西園景多暇。可以少躊躇。池鳥澹容與。橋柳高扶疎。烟蔓媚青蘚。水花披白蕖。何人造茲亭。華敞綽有餘。四簷軒鳥翅。複屋羅蜘蛛。直廊抵曲房。窈窕深且虛。脩竹夾左右。清風來徐徐。此宜宴嘉賓。鼓瑟吹笙竽。荒淫卽不可。廢曠將何如。幸有酒與樂。及時歡且娛。忽其解郡印。他人來此居。

郡中西園

閑園多芳草。春夏香靡靡。深樹足佳禽。旦暮鳴不已。院閑閉松竹。庭徑穿蘭芷。愛彼池上橋。獨來聊徙倚。魚依藻長樂。鷗見人暫起。有時舟隨風。盡日蓮照水。誰知郡府內。景物閑如此。始悟誼靜緣。何嘗繫遠邇。

北亭臥

樹綠晚陰合。池涼朝氣清。蓮開有佳色。鶴唳無凡聲。唯此閑寂境。愜我幽獨情。病假十五日。十日臥茲亭。明朝吏呼起。還復視黎甿。

一葉落

煩暑鬱未退。涼颿潛已起。寒溫與盛衰。遞相爲表裏。蕭蕭秋林下。一葉忽先委。勿言微搖落。搖落從此始。崔湖州贈紅石琴薦煥如錦文無以答之以詩酬謝

麟錦支綠綺。韻同相感深。千年古澗石。八月秋堂琴。引出山水思。助成金玉音。人間無可比。比我與君心。

九日宴集醉題郡樓兼呈周殷二判官

前年九日在餘杭。呼賓命宴虛白堂。去年九日到東洛。今年九日來吳鄉。兩邊蓬鬢一時白。三處菊花同色黃。一日日知添老病。一年年覺惜重陽。江南九月未搖落。柳青蒲綠稻穠香。姑蘇臺榭倚蒼鶻。太湖山水含清光。可憐假日好天色。公門吏靜風景涼。榜舟鞭馬取賓客。掃樓拂石排壺觴。胡琴錚鏦指撥刺。吳娃美麗眉眼長。笙歌一曲思凝絕。金鈿再拜光低昂。日脚欲落備燈燭。風頭漸高加酒漿。觥盞灑翻菡萏葉。舞鸞擺落茱萸房。半酣憑檻起四顧。七堰八門六十坊。遠近高低寺間出。東西南北橋相望。水道脈分棹鱗次。里閭碁布城册方。人烟樹色無隙罅。十里一片青茫茫。自問有何才與政。高廳大館居中央。銅魚今乃澤國節。刺史是古吳郡王。郊無戎馬郡無事。門有檠戟腰有章。盛時儻來合慚愧。壯歲忽去還感傷。從事醒歸應不可。使君醉倒亦何妨。請君停杯聽我語。此語真實非虛狂。五旬已過不爲天。七十爲期蓋是常。須知菊酒登高會。從此多無二十場。

同微之贈別郭虛舟鍊師五十韻

我爲江司馬。君爲荆判司。俱當愁悴日。始識虛舟師。師年三十餘。白皙好容儀。專心在鉛汞。餘力工琴碁。靜彈絃數聲。閑飲酒一卮。因指塵土下。蜉蝣良可悲。不聞姑射上。千歲冰雪肌。不見遼城外。古今塚壘纍。嗟我天地間。有術人莫知。得可逃死籍。不唯走三尸。授我參同契。其辭妙且微。六一闕扁鑄。子午守雄雌。我讀隨日悟。心中了無疑。黃牙與紫車。謂其坐致之。自負因自歎。人生號男兒。若不佩金印。卽合翳玉芝。

高謝人間世。深結山中期。泥壇方合矩。鑄鼎圓中規。鑪臺一以動。瑞氣紅輝輝。齋心獨嘆拜。中夜儉一窺。二物正訴合。厥狀何怪奇。綢繆夫婦禮。狎獵魚龍姿。簡寂館鍾後。紫霄峯曉時。心塵未淨潔。火候遂參差。萬壽觀刀圭。千功失毫釐。先生彈指起。姪女隨烟飛。始知緣會間。陰騭不可移。藥籠今夕罷。詔書明日追。追我復追君。次第承恩私。官雖小大殊。同立白玉墀。我直紫微闥。手進賞罰詞。君侍玉皇座。口含生殺機。直躬易媒孽。浮俗多瑕疵。轉徙今安在。越嶠吳江湄。一提支郡印。一建連帥旗。何言四百里。不見如天涯。秋風旦夕來。白日西南馳。雪霜各滿鬢。朱紫徒爲衣。師從廬山洞。訪舊來於斯。尋君又覓我。風馭紛逶迤。帔裾曳黃絹。鬢髮垂青絲。逢人但斂手。問道亦頷頤。孤雲難久留。十日告將歸。款曲話平昔。殷勤勉衰羸。後會杳何許。前心日磷緇。俗家無異物。何以充別資。素牋一百句。題附元家詩。朱頂鶴一隻。與師雲間騎。雲間鶴背上。故情若相思。時時摘一句。唱作步虛辭。

霓裳羽衣歌 和微之

我昔元和侍憲皇。曾陪內宴宴昭陽。千歌百舞不可數。就中最愛霓裳舞。舞時寒食春風天。玉鉤欄下香
按前。按前舞者顏如玉。不著人家俗衣服。虹裳霞帔步搖冠。鈿環纍纍珮珊珊。娉婷似不任羅綺。顧聽樂
懸行復止。磬簫箏笛遞相攙。擊擗彈吹聲遡迤。散序六奏未動衣。陽臺宿雲慵不飛。中序擘騁初入拍。秋
竹竿裂春冰折。飄然轉旋迴雪輕。嫣然縱送游龍驚。小垂手後柳無力。斜曳裾時雲欲生。烟蛾斂略不勝
態。風袖低昂如有情。上元點鬢招萼綠。王母揮袂別飛瓊。繁音急節十二遍。跳珠撼玉何鏗錚。翔鸞舞了
却收翅。唳鶴曲終長引聲。當時乍見驚心目。凝視諦聽殊未足。一落人間八九年。耳冷不曾聞此曲。湓城

但聽山魘語。巴峽唯聞杜鵑哭。移領錢塘第二年。始有心情問絲竹。玲瓏筚篥謝好箏。陳龍臂篋沈平笙。清絃脆管纖纖手。教得霓裳一曲成。虛白亭前湖水畔。前後祇應三度按。便除庶子拋却來。聞道如今各星散。今年五月至蘇州。朝鍾暮角催白頭。貪看案牘常侵夜。不聽笙歌直到秋。秋來無事多閑悶。忽憶霓裳無處問。聞君部內多樂徒。問有霓裳舞者無。答云七縣十萬戶。無人知有霓裳舞。唯寄長歌與我來。題作霓裳羽衣譜。四幅花箋碧間紅。霓裳實錄在其中。千姿萬狀分明見。恰與昭陽舞者同。眼前髣髴觀形質。昔日今朝想如一。疑從魂夢呼召來。似著丹青圖寫出。我愛霓裳君合知。發於歌詠形於詩。君不見我歌云。驚破霓裳羽衣曲。又不見我詩云。曲愛霓裳未拍時。由來能事皆有主。楊氏創聲君造譜。君言此舞難得人。須是傾城可憐女。吳妖小玉飛作烟。越豔西施化爲土。嬌花巧笑久寂寥。娃館苧蘿空處所。如君所言誠有是。君試從容聽我語。若求國色始醜傳。但恐人間廢此舞。妍蚩優劣寧相遠。大都祇在人擡舉。李娟張態君莫嫌。亦擬隨宜且教取。

小童薛陽陶吹觱篥歌 和浙西李大夫作

剪削乾蘆插寒竹。九孔漏聲五音足。近來吹者誰得名。關雎老死李衮生。衮今又老誰其嗣。薛氏樂童年十二。指點之下師授聲。含囁之間天與氣。潤洲城高霜月明。吟霜思月欲發聲。山頭江底何悄悄。猿鳥不喘魚龍聽。翕然聲作疑管裂。詘然聲盡疑刀截。有時婉軟無筋骨。有時頓挫生稜節。急聲圓轉促不斷。轆轤轆似珠貫。緩聲展引長有條。有條直直如筆描。下聲乍墜石沉重。高聲忽舉雲飄蕭。明日公堂陳宴席。主人命樂娛賓客。碎絲細竹徒紛紛。宮調一聲雄出羣。衆音覩縷不落道。有如部伍隨將軍。嗟爾陽陶

方稚齒下手發聲已如此。若教頭白吹不休。但恐聲名壓關李。

啄木曲

莫買寶剪刀。虛費千金直。我有心中愁。知君剪不得。莫磨解結錐。虛勞人氣力。我有腸中結。知君解不得。莫染紅絲線。徒誇好顏色。我有雙淚珠。知君穿不得。莫近紅爐火。炎氣徒相逼。我有兩鬢霜。知君銷不得。刀不能剪心愁。錐不能解腸結。線不能穿淚珠。火不能銷鬢雪。不如飲此神聖杯。萬念千憂一時歇。

題靈巖寺

娃宮屐廊尋已傾。硯池香徑又欲平。二三月時但草綠。幾百年來空月明。使君雖老頗多思。攜觴領妓處處行。今愁古恨入絲竹。一曲涼州無限情。直自當時到今日。中間歌吹更無聲。

雙石

蒼然兩片石。厥狀怪且醜。俗用無所堪。時人嫌不取。結從肝渾始。得自洞庭口。萬古遺水濱。一朝入吾手。擔昇來郡內。洗刷去泥垢。孔黑烟痕深。鱗青苔色厚。老蛟蟠作足。古劍插爲首。忽疑天上落。不似人間有。一可支吾琴。一可貯吾酒。峭絕高數尺。坳泓容一斗。五絃倚其左。一盃置其右。窪樽酌未空。玉山頽已久。人皆有所好。物各求其偶。漸恐少年場。不容垂白叟。迴頭問雙石。能伴老夫否。石雖不能言。許我爲三友。

宿東亭曉興

溫溫土爐火。耿耿紗籠燭。獨抱一張琴。夜入東齋宿。銜聲度殘漏。簾影浮初旭。頭癢曉梳多。眼昏春睡足。負暄簷宇下。散步池塘曲。南鴈云未迴。東風來何速。雪依瓦溝白。草遶牆根綠。何言萬戶州。太守常幽獨。

日漸長贈周殷二判官

日漸長。春尚早。牆頭半露紅萼枝。池岸新鋪綠牙草。蹋草攀枝仰頭歎。何人知此春懷抱。年顏盛壯名未成。官職欲高身已老。萬莖白髮直堪恨。一片緋衫何足道。賴得君來勸一杯。愁開悶破心頭好。

花前歎

前歲花前五十二。今年花前五十五。歲課年功頭髮知。從霜成雪君看取。幾人得老莫自嫌。樊李吳韋盡成土。南州桃李北州梅。且喜年年作花主。花前置酒誰相勸。容坐唱歌滿起舞。欲散重拈花細看。爭知明日無風雨。

自詠五首

朝亦隨羣動。暮亦隨羣動。榮華瞬息間。求得將何用。形骸與冠蓋。假合相戲弄。何異睡著人。不知夢是夢。

又一首

一家五十口。一郡十萬戶。出爲差科頭。入爲衣食主。水旱合心憂。飢寒須手撫。何異食蓼蟲。不知苦是苦。

又一首

公私頗多事。衰憊殊少歡。迎送賓客懶。鞭笞黎庶難。老耳倦聲樂。病口厭杯盤。既無可戀者。何以不休官。

又一首

一日復一日。自問何留滯。爲貪逐日俸。擬作歸田計。亦須隨豐約。可得無限劑。若待足始休。休官在何歲。

又一首

官舍非我廬。官園非我樹。洛中有小宅。渭上有別墅。既無婚嫁累。幸有歸休處。歸去誠已遲。猶勝不歸去。

和微之聽妻彈別鶴操因爲解釋其義依韻加四句

義重莫若妻。生離不如死。誓將死同穴。其柰生無子。商陵迫禮教。婦出不能止。舅姑明且辭。夫妻中夜起。起聞雙鶴別。若與人相似。聽其悲唳聲。亦如不得已。青田八九月。遼城一萬里。徘徊去住雲。嗚咽東西水。寫之在琴曲。聽者酸心髓。況當秋月彈。先入憂人耳。怨抑掩朱絃。沈吟停玉指。一聞無兒歎。相念兩如此。無兒雖薄命。有妻偕老矣。幸免生別離。猶勝商陵氏。

題故元少尹集後二首

黃壤詎知我。白頭徒憶君。唯將老年淚。一灑故人文。遺文三十軸。軸軸金玉聲。龍門原上土。埋骨不埋名。

和微之四月一日作

四月一日天。花稀葉陰薄。泥新燕影忙。蜜熟蜂聲樂。麥風低冉冉。稻水平漠漠。芳節忽蹉跎。遊心稍牢落。春華信爲美。夏景亦未惡。颭浪嫩青荷。熏欄晚紅藥。吳宮好風月。越郡多樓閣。兩地誠可憐。其柰人離索。

吳中好風景二首

吳中好風景。八月如三月。水荇葉仍香。木蓮花未歇。海天微雨散。江郭纖埃滅。暑退衣服乾。湖生船舫活。兩衙漸多暇。亭午初無熱。騎吏語使君。正是遊時節。

又一首

吳中好風景。風景舊朝暮。曉色萬家烟。秋聲八月樹。舟移絃管動。橋擁旌旗駐。改號齊雲樓。重開武丘路。况當豐熟歲。好是歡遊處。州民勸使君。且莫拋官去。

白太守行 劉禹錫

聞有白太守。拋官歸無谿。蘇州十萬戶。盡作嬰兒啼。太守駐行舟。閭門草萋萋。揮袂謝啼者。依然兩眉低。朱戶非不崇。我心如重狴。華池非不清。意在寥廓栖。夸者竊所怪。賢者默思齊。我爲太守行。題在隱起珪。

答

吏滿六百石。昔賢輒去之。秩登二千石。今我方罷歸。我秩訝已多。我歸慚已遲。猶勝塵土下。終老無休期。臥乞百日告。起吟五篇詩。朝與府吏別。暮與州民辭。去年到郡時。麥穗黃離離。今年去郡日。稻花白霏霏。爲郡已周歲。半歲罹旱飢。襦袴無一片。甘棠無一枝。何乃老與幼。泣別盡霑衣。下慚蘇民淚。上愧劉君辭。

別蘇州

浩浩姑蘇民。鬱鬱長洲城。來慚荷寵命。去愧無能名。青紫行將吏。斑白列黎甿。一時臨水拜。十里隨舟行。餞筵猶未收。征棹不可停。稍隔烟樹色。尙聞絲竹聲。悵望武丘路。沈吟澣水亭。還鄉信有興。去郡能無情。

卯時酒

佛法讚醜酬。仙方誇沉瀝。未如卯時酒。神速功力倍。一杯置掌上。三嚥入腹內。煦若春貫腸。暄如日炙背。豈獨支體暢。仍加志氣大。當時遺形骸。竟日忘冠帶。似遊華胥國。疑反混元代。一性既完全。萬機皆破碎。半醒思往來。邇來可吁怪。寵辱憂喜間。惶惶二十載。前年辭紫闥。今歲拋皂蓋。去矣魚反泉。超然蟬離蛻。

是非莫分別。行止無疑礙。浩氣貯胸中。青雲委身外。捫心私自語。自語誰能會。五十年來心。未如今日泰。况茲杯中物。行坐長相對。

自問行何遲

前月發京口。今辰次淮涯。二旬四百里。自問行何遲。還鄉無他計。罷郡有餘資。進不慕富貴。退未憂寒飢。以此易過日。騰騰何所爲。逢山輒倚棹。遇寺多題詩。酒醒夜深後。睡足日高時。眼底一無事。心中百不知。想到京國日。懶放亦如斯。何必冒風水。促促趁程歸。

除日答夢得同發楚州

共作千里伴。俱爲一郡迴。歲陰中路盡。鄉思先春來。山雪晚猶在。淮冰晴欲開。歸歟吟可作。休戀主人杯。

問楊瓊

古人唱歌兼唱情。今人唱歌唯唱聲。欲說向君君不會。試將此語問楊瓊。

有感三首

鬢毛已斑白。衣綬方朱紫。窮賤當壯年。富榮臨暮齒。車輿紅塵合。第宅青煙起。彼來此須去。品物之常理。第宅非吾廬。逆旅暫留止。子孫非我有。委蛻而已矣。有如蠶造繭。又似花生子。子結花暗凋。繭成蠶老死。悲哉可奈何。舉世皆如此。

又一首

莫養瘦馬駒。莫教小妓女。後事在目前。不信君看取。馬肥快行走。妓長能歌舞。三年五歲間。已聞換一主。

借問新舊主。誰樂誰辛苦。請君大帶上。把筆書此語。

又一首

往事勿追思。追思多悲愴。來事勿相迎。相迎亦惆悵。不如兀然坐。不如塌然臥。食來即開口。睡來即合眼。二事最關身。安寢加餐飯。忘懷任行止。委命隨脩短。更若有興來。狂歌酒一盞。

宿滎陽

生長在滎陽。少小辭鄉曲。迢迢四十載。復到滎陽宿。去時十一二。今年五十六。追思兒戲時。宛然猶在目。舊居失處所。故里無宗族。豈唯變市朝。兼亦遷陵谷。獨有溱洧水。無情依舊淥。

經溱洧

落日駐行騎。沈吟懷古情。鄭風變已盡。溱洧至今清。不見士與女。亦無芍藥名。

就花枝

就花枝。移酒海。今朝不醉明朝悔。且算歡娛逐日來。任他容鬢隨年改。醉翻衫袖拋小令。笑擲骰盤呼大采。自量氣力心與情。三五年間猶得在。

喜雨

圃旱憂葵萎。農旱憂禾莢。人各有所私。我早憂松竹。松乾竹燠死。眷眷任心目。灑葉溉其根。汲水勞僮僕。油雲忽東起。涼雨淒相續。似面洗垢塵。如頭得膏沐。千柯習習潤。萬葉欣欣綠。十日澆灌功。不如一靈霖。方知宰生靈。何異活草木。所以聖與賢。同心調玉燭。

題道宗上人十韻 并序

善濟寺律大德宗上人法堂中有故相國鄭司徒歸尚書陸刑部元少尹及今吏部鄭相中書章相錢左丞詩覽其題皆與上人唱酬閱其人皆朝賢省其文皆義語予始知上人之文爲義作爲法作爲方便智作爲解脫性作不爲詩而作也知上人者云爾恐不知上人者謂爲護國法振靈一皎然之徒與故予題二十句以解之

如來說偈讚菩薩著論議是故宗律師以詩爲佛事一音無差別四句有詮次欲使第一流皆知不二義精潔霑戒體閑澹藏禪味從容恣語言縹緲離文字旁延邦國彥上達王公貴先以詩句牽後令入佛智人多愛師句我獨知師意不似休上人空多碧雲思

寄皇甫賓客

名利既兩忘形體方自遂臥掩羅雀門無人驚我睡睡足斗薺衣閑步中庭地食飽摩挲腹心頭無一事除却玄晏翁何人知此味

寄庾侍郎

一雙華亭鶴數片太湖石嶸嶸蒼玉峯矯矯青雲翮是時歲云暮淡薄烟景夕庭霜封石稜池雪印鶴跡幽致竟誰別閑靜聊自適懷哉庾順之好是今宵客

寄崔少監

微微西風生稍稍東方明入秋神骨爽琴曉絲桐清彈爲古宮調玉水寒泠泠自覺絃指下不是尋常聲

須臾羣動息。掩琴坐空庭。直至日出後。猶得心和平。惜哉意未已。不使崔君聽。

醉題沈子明壁

不愛君池東十叢菊。不愛君池南萬竿竹。愛君簾下唱歌人。色似芙蓉聲似玉。我有陽關君未聞。若聞亦應愁煞君。

勸酒

勸君一盃君莫辭。勸君兩盃君莫疑。勸君三盃君始知。面上今日老昨日。心中醉時勝醒時。天地迢迢自長久。白兔赤烏相趁走。身後堆金拄北斗。不如生前一樽酒。君不見春明門外天欲明。喧喧歌哭半死生。遊人駐馬出不得。白輿紫車爭路行。歸去來。頭已白。典錢將用買酒喫。

落花

留春春不住。春歸人寂寞。厭風風不定。風起花蕭索。既與風前歎。重命花下酌。勸君嘗綠醅。教人拾紅萼。桃飄火燄燄。梨墮雪漠漠。獨有病眼花。春風吹不落。

對鏡吟

白頭老人照鏡時。掩鏡沉吟吟舊詩。二十年前一莖白。如今變作滿頭絲。吟罷迴頭索盃酒。醉來屈指數親知。老於我者多窮賤。設使身存寒且飢。少於我者半爲土。墓樹已抽三五枝。我今幸得見頭白。祿俸不薄官不卑。眼前有酒心無苦。祇合歡娛不合悲。

耳順吟寄敦詩夢得

三十四十五懸牽。七十八百病纏。五十六却不要。恬淡清淨心安然。已過愛貪聲利後。猶在病羸昏
老前。未無筋力尋山水。尙有心情聽管絃。閑開新酒嘗數盞。醉憶舊詩吟一篇。敦詩夢得且相勸。不用嫌
他耳順年。

別氈帳火爐

憶昨臘月天。北風三尺雪。年老不禁寒。夜長安可徹。賴有青氈帳。風前自張設。復此紅火爐。雪中相暖熱。
如魚入澗水。似兔藏深穴。婉軟蟄鱗蘇。溫燉凍肌活。方安陰慘夕。遽變陽和節。無奈時候遷。豈是恩情絕。
霧簾逐日卷。香燎隨灰滅。離恨屬三春。佳期在十月。但今此身健。不作多時別。

六年春贈分司東都諸公

我爲司州牧。內愧無才術。忝擢恩已多。遭逢幸非一。偶當穀賤歲。適值民安日。郡縣獄空虛。鄉閭盜奔逸。
其間最幸者。朝客多分秩。行接鷓鴣羣。坐成芝蘭室。時聯拜表騎。聞動題詩筆。夜雪秉燭遊。春風攜榼出。
花教鶯點檢。柳付風排比。法酒澹清漿。含桃媚紅實。洛童調金管。盧女鏗瑤瑟。黛慘歌思深。腰凝舞拍密。
每因同醉樂。自覺忘衰疾。始悟肘後方。不如杯中物。生涯隨日過。世事何時畢。老子苦乖慵。希君數牽率。
九日代羅樊二妓招舒著作 齊梁格

羅敷斂雙袂。樊姬獻一杯。不見舒員外。秋菊爲誰開。

憶舊遊

憶舊遊。舊遊安在哉。舊遊之人半白首。舊遊之地多蒼苔。江南舊遊凡幾處。就中最憶吳江隈。長洲花綠

柳萬樹。齊雲樓。春酒一盃。闐門曉。嚴旗鼓出。羣橋夕。闌船舫迴。脩蛾慢臉。燈下醉。急管繁絃。頭上催。六七年。前狂爛熳。三千里外。思徘徊。李娟張態。成春夢。周五殷三。歸夜臺。虎丘月色。爲誰好。娃宮花枝。應自開。賴得劉郎。解吟詠。江山氣色。合歸來。

答崔賓客晦叔十二月四日見寄

今歲日餘二十六。來歲年登六十二。尙不能憂眼下身。因何更算人間事。居士忘筌默默坐。先生枕麴昏昏睡。早晚相從歸醉鄉。醉鄉去此無多地。

勸我酒

勸我酒。我不辭。請君歌。歌莫遲。歌聲長。辭亦切。此辭聽者。堪愁絕。洛陽女兒。面似花。河南大尹。頭如雪。

贈韋處士六年夏大熱旱

驕陽連毒暑。動植皆枯槁。旱日乾密雲。炎烟燠茂草。少壯猶困苦。况子病且老。旣無白梅檀。何以除熱惱。汗巾束頭鬢。羶食熏襟抱。始覺韋山人。休糧散髮好。

卷五十二

格詩雜體 凡六十首

和微之詩二十三首 并序

微之又以近作四十三首寄來。命僕繼和。其間瘵絮四百字。車斜二十篇者。流皆韻劇辭殫。瓌奇怪譎。又

題云奉煩祇此一度。乞不見辭。意欲定霸取威。置僕於窮地耳。大凡依次用韻。韻同而意殊。約體爲文。文成而理勝。此足下素所長者。僕何有焉。今足下果用所長。過蒙見寤。然敵則氣作。急則計生。四十二章。塵掃並畢。不知大敵以爲如何。夫斷石破山。先觀鑿跡。發矢中的。兼聽絃聲。以足下來章。惟求相困。故老僕報語不覺大誇。况曩者唱酬。近來因繼。已十六卷。凡千餘首矣。其爲敵也。當今不見。其爲多也。從古未聞。所謂天下英雄。唯使君與操耳。戲及此者。亦欲三千里外。一破愁顏。勿示他人。以取笑誚。樂天白。

和晨霞 此後在上都作

君歌仙氏真。我歌慈氏真。慈氏發真念。念此閻浮人。左命大迦葉。右召桓提因。千萬化菩薩。百億諸鬼神。上自非想頂。下及風水輪。胎卵溼化類。蠢蠢難具陳。弘願在救拔。大悲忘辛勤。無論善不善。豈問寃與親。抉開生盲眼。擺去煩惱塵。燭以智慧日。灑之甘露津。千界一時度。萬法無與鄰。借問晨霞子。何如朝玉宸。

和送劉道士遊天台

聞君夢遊仙。輕舉超世霧。握持尊皇節。統衛吏兵軍。靈旂星月象。天衣龍鳳紋。佩服交帶籙。諷吟蕊珠文。闕宮縹緲間。鈞樂依稀聞。齋心謁西母。暝拜朝東君。烟霏子晉裾。霞爛麻姑裙。倏忽別真侶。悵望隨歸雲。人生同大夢。夢與覺誰分。况此夢中夢。悠哉何足云。假如金闕頂。設使銀河潰。既未出三界。猶應在五蘊。飲嚙日月精。茹嚼沆瀣芬。尙是色香味。六塵之所熏。仙中有大仙。首出夢幻羣。慈光一照燭。奧法相烟燼。不知萬齡暮。不見三光曛。一性自了了。萬緣徒紛紛。苦海不能漂。劫火不能焚。此是竺乾教。先生垂典墳。

和憐沐寄道友

櫛沐事朝謁。中門初動關。盛服去尙早。假寐須臾間。鍾磬發東寺。夜色藏南山。停驂待五漏。人馬同時閑。高星粲金粟。落月沉玉環。出門向闕路。坦坦無阻艱。始出里北閤。稍轉市西闌。晨燭照朝服。紫爛復朱殷。由來朝庭士。一入多不還。因循擲白日。積漸凋朱顏。青雲已難致。碧落安能攀。但且知止足。尙可銷憂患。

和祝蒼華

日居復月諸。環迴照下土。使我玄雲髮。化爲素絲縷。稟質本羸劣。養生仍鹵莽。痛飲困連宵。悲吟飢過午。遂令頭上髮。種種無尺五。根稀比黍苗。梢細同斂股。豈是乏膏沐。非關櫛風雨。最爲悲傷多。心焦衰落苦。餘者能有幾。落者不可數。秃似鵲填河。墮如烏解羽。蒼華何用祝。苦辭亦休吐。匹如剃頭僧。豈要巾冠主。

和我年三首

我年五十七。榮名得幾許。甲乙三道科。蘇杭兩州主。才能本淺薄。心力虛勞苦。可能隨衆人。終老於塵土。

又一首

我年五十七。歸去誠已遲。歷官十五政。數若珠纍纍。野萃始賓薦。場苗初藝維。因讀管蕭書。竊慕大有爲。及遭榮遇來。乃覺才力羸。黃紙詔頻草。朱輪車載脂。妻孥及僕使。皆免寒與飢。省躬私自愧。知我者微之。永懷山陰守。未遂嵩陽期。如何坐留滯。頭白江之湄。

又一首

我年五十七。榮名得非少。報國竟何如。謀身猶未了。昔嘗速官謗。恩大而懲小。一黜鶴辭軒。七年魚在沼。將枯鱗再躍。經鍛翮重矯。白日上昭昭。青雲高渺渺。平生頗同病。老大宜相曉。紫綬足可榮。白頭不爲夭。

夙懷慕箕穎。晚節期於篠。何當闕下來。同拜陳情表。

和三月三十日四十韻

送春君何在。君在山陰署。憶我蘇杭時。春遊亦多忤。爲君歌往事。豈取辭勞慮。莫怪言語狂。須知酬答遽。
江南臘月半。冰凍凝如瘵。寒景尙蒼茫。和風已吹噓。女牆城似竈。鴈齒橋如鋸。魚尾上淵淪。草芽生沮洳。
律遲太蕨管。日緩羲和馭。布澤木龍催。迎春土牛助。雨師習習灑。雲將飄飄翫。四野萬里晴。千山一時曙。
杭土麗且康。蘇民富而庶。善惡有懲勸。剛柔無吐茹。兩衙少辭牒。四境稀書疏。俗以勞徠安。政因閑暇著。
仙亭日登眺。虎丘時遊預。尋幽駐旌軒。選勝迴賓御。舟移溪鳥避。樂作林猿覩。池古莫耶沉。石奇羅刹踞。
水苗泥易耨。畝粟灰難鋤。紫蕨抽出畦。白蓮埋在淤。菱花紅帶踏。溼葉黃含菸。鏡動波颭菱。雪迴風旋絮。
手經攀桂馥。齒爲嘗梅楚。坐併船脚欹。行多馬蹄阻。聖賢清濁醉。水陸鮮肥飫。魚鱸芥醬調。水葵鹽鼓絮。
雖微五袴詠。幸免兆人詛。但令樂不荒。何必遊無倨。吳苑僕尋罷。越城公尙據。舊遊幾客存。新宴誰人與。
莫空文舉酒。強下何曾筮。江上易優游。城中多毀譽。分應當自盡。事勿求人恕。我旣無子孫。君仍畢婚娶。
久爲雲雨別。終擬江湖去。范蠡有扁舟。陶潛有籃輿。兩心苦相憶。兩口遙相語。最恨七年春。春來各一處。

和寄樂天

賢愚類相交。人情之大率。然自古今來。幾人號膠漆。近聞屈指數。元某與白乙。旁愛及弟兄。中懷避家室。
松筠與金石。未足喻堅密。在車如輪轅。在身如肘腋。又如風雲會。天使相召匹。不似勢利交。有名而無實。
頃我在杭歲。值君之越日。望愁來儀遲。宴惜流景疾。坐耀黃金帶。酌醅頽玉質。酣歌口不停。狂舞衣相拂。

平生賞心事。施展十未一。會笑始啞啞。離嗟乃唧唧。餞筵纔收拾。征棹遞排比。後恨苦緜緜。前歡何卒卒。居人色慘澹。行子心紆鬱。風袂去時揮。雲帆望中失。宿醒和別思。目眩心忽忽。病魂黯然銷。老淚淒其出。別君祇如昨。芳歲換六七。俱是官家身。後期難自必。

和寄問劉白

正與劉夢得。醉笑大開口。適值此詩來。歡喜君知否。遂令高卷幕。兼遣重添酒。起望會稽雲。東南一迴首。愛君金玉句。舉世誰人有。功用隨日新。資材本天授。吟我不能散。自午將及酉。遂留夢得眠。匡牀宿東牖。和新樓北園偶集從孫公度周巡官韓秀才盧秀才范處士小飲鄭侍御判官周劉二從事皆先歸

聞君新樓宴。下對北園花。主人既賢豪。賓客皆才華。初筵日未高。中飲景已斜。天地爲幕席。富貴如泥沙。嵇劉陶阮徒。不足置齒牙。臥甕鄙畢卓。落帽嗤孟嘉。芳草供枕藉。亂鶯助諠譁。醉鄉得道路。狂海無津涯。一歲春又盡。百年期不賒。同醉君勿辭。獨醒古所嗟。銷愁若沃雪。破悶如剖瓜。稱觴起爲壽。此樂無以加。歌聲疑貫珠。舞袖飄亂霞。相公謂四座。今日非自誇。有奴善吹笙。有婢彈琵琶。十指纖若筍。雙鬢黑如鴉。履舄起交雜。杯盤散紛拏。歸去勿擁遏。倒載逃難遮。明日宴東武。後日遊若耶。豈獨相公樂。謳歌千萬家。

和除夜作

君賦此詩夜。窮陰歲之餘。我和此詩日。微和春之初。老知顏狀改。病覺支體虛。頭上毛髮短。口中牙齒疎。一落老病界。難逃生死墟。况此促促世。與君多索居。君在浙江東。榮駕方伯輿。我在魏關下。謬乘大夫車。

妻孥常各飽。奴婢亦盈廬。唯是利人事。比君全不如。我統十郎官。君領百吏胥。我掌四曹局。君管十鄉閭。君爲父母君。大惠在資儲。我爲刀筆吏。小惡乃誅鋤。君提七郡籍。我按三尺書。俱已佩金印。嘗同趨玉除。外寵信非薄。中懷何不攄。恩光未報答。日月空居諸。磊落嘗許君。踟促應笑予。所以自知分。欲允歌歸歎。

和知非

因君知非問。詮較天下事。第一莫若禪。第二無如醉。禪能泯人我。醉可忘榮悴。與君次第言。爲我少留意。儒教重禮法。道家養神氣。重禮足滋彰。養神多避忌。不如學禪定。中有甚深味。曠廓了如空。澄凝勝於睡。屏除默默念。銷盡悠悠思。春無傷春心。秋無感秋淚。坐成真諦樂。如受空王賜。旣得脫塵勞。兼應離慚愧。除禪其次醉。此說非無謂。一酌機卽忘。三杯性咸遂。逐臣去室婦。降虜敗軍帥。思苦膏火煎。憂深局鑊祕。須憑百杯沃。莫惜千金費。便似軍中魚。脫飛生兩翅。勸君雖老大。逢酒莫迴避。不然卽學禪。兩途同一致。

和望曉

休吟稽山晚。聽詠秦城旦。鳴雞初有聲。宿鳥猶未散。丁丁漏向盡。瑟瑟鼓過半。南山青沉沉。東方白漫漫。街心若流水。城角如斷岸。星河稍隅落。宮闕方輪煥。朝車雷四合。騎火星一貫。赫奕冠蓋盛。熒煌朱紫爛。沙堤亘蟆池。市路遶籠斷。白日忽照耀。紅塵紛散亂。貴教過客避。榮任行人看。祥烟滿虛空。春色無邊畔。鷓鴣行候晷刻。龍尾登霄漢。臺殿暖宜攀。風光晴可翫。草鋪地茵褥。雪卷天幃幔。鸞雞佩鏘鏘。花饒衣粲粲。何言終日樂。獨起臨風歎。歎我同心人。一別春七換。相望山隔礙。欲去官羈絆。何日到江東。超然似張翰。

和李勢女

減一分太短。增一分太長。不朱面若花。不粉肌如霜。色爲天下豔。心乃女中郎。自言重不幸。家破身未亡。人各有一死。此死職所當。忍將先人體。與主爲沈瘡。妾死主意快。從此兩無妨。願信赤心語。速卽白刃光。南郡忽感激。却立捨鋒鏑。撫背稱阿姊。歸我如歸鄉。竟以恩信待。豈止猜妬忘。由來机上肉。不足揮干將。南郡死已久。骨枯墓蒼蒼。願於墓上頭。立石鐫此章。勸誠天下婦。不令陰勝陽。

和酬鄭侍御東陽春悶放懷追越遊見寄

君得嘉魚置賓席。樂如南有嘉魚時。勁氣森爽竹竿疎。妍文煥爛芙蓉披。載筆在幕名已重。補袞於朝官尙卑。一緘疏入掩谷永。三都賦成排左思。自言拜辭主人後。離心蕩颺風前旗。東南門館別經歲。春眼悵望秋心悲。昨日嘉魚來訪我。方駕同出何所之。樂遊原頭春尙早。百舌新語聲裊裊。日趁花忙向南坼。風催柳急從東吹。流年愉悅不饒我。美景鮮妍來爲誰。紅塵三條界阡陌。碧草千里鋪郊畿。餘霞斷時綺幅裂。斜雲展處羅文紕。暮鍾遠近聲互動。暝鳥高下飛追隨。酒酣將歸未能去。悵然迴望天四垂。生何足養。稽著論。途何足泣。楊漣洏。胡不花下伴春醉。滿酌綠酒聽黃鸝。嘉魚點頭時一歎。聽我此言不知疲。語終興盡各分散。東西軒騎分逶迤。此詩勿遣閑人見。見恐與他爲笑資。白首舊寮知我者。憑君一詠向周師。

和自勸二首

稀稀疏疏遠籬竹。窄窄狹狹向陽屋。屋中有一曝背翁。委置形骸如土木。日暮半爐爇炭火。夜深一盞紗籠燭。不知有益及民無。二十年來食官祿。就暖移盤簷下食。防寒擁被帷中宿。秋官月俸八九萬。豈徒遣爾身溫足。勤操丹筆念黃沙。莫使飢寒囚滯獄。

急景凋年急於水。念此攬衣中夜起。門無宿客共誰言。煖酒挑燈對妻子。身飲數杯妻一盞。餘酌分張與兒女。微酣靜坐未能眠。風濺蕭蕭打窗紙。自問有何才與術。入爲丞郎出刺史。又知壽命短復長。豈得營營心不止。請看韋孔與錢崔。半月之間四人死。

和雨中花

眞宰倒持生殺柄。閑物命長人短命。松枝上鶴蒼下龜。千年不死仍無病。人生不得似龜鶴。少去老來同旦暝。何異花開旦暝間。未落仍遭風雨橫。草得經年菜連月。唯花不與多時節。一年三百六十日。花能幾日供攀折。桃李無言難自訴。黃鶯解語憑君說。鶯雖爲說不分明。葉底枝頭謾饒舌。

和晨興因報問龜兒

冬旦寒慘澹。雲日無晶輝。當此歲暮感。見君晨興詩。君詩亦多苦。苦在兄遠離。我苦不在遠。纏綿肝與脾。西院病孀婦。後牀孤姪兒。黃昏一慟後。夜半一起時。病眼兩行血。悲鬢萬莖絲。咽絕五藏脈。消滲百骸脂。雙目失一目。四肢斷兩肢。不如溘然盡。安用半活爲。誰謂茶檠苦。茶檠甘如飴。誰謂湯火熱。湯火冷如澌。前時君寄詩。憂念問阿龜。喉燥聲氣窒。經年無報辭。及覩晨興句。未吟先涕垂。因茲漣漣際。一吐心中悲。茫茫四海間。此苦唯君知。去我四千里。使我告訴誰。仰頭向青天。但見鴈南飛。憑鴈寄一語。爲我達微之。弦絕有續膠。樹斬可接枝。唯我中腸斷。應無連得期。

和朝迴與王鍊師遊南山下

藹藹春景餘。峨峨夏雲初。躑躅退朝騎。飄飄隨風裾。晨從四丞相。入拜白玉除。暮與一道士。出尋青谿居。

吏隱本齊致。朝野孰云殊。道在有中適。機忘無外虞。但愧煙霄上。鸞鳳爲吾徒。又慚雲水間。鳴鶴不我疎。坐傾數杯酒。臥枕一卷書。興酣頭兀兀。睡覺心于于。以此送日月。問師爲何如。

和嘗新酒

空腹嘗新酒。偶成卯時醉。醉來擁褐裘。直至齋時睡。靜酣不語笑。真寢無夢寐。殆欲忘形骸。詎知屬天地。醒餘和未散。起坐澹無事。舉臂一欠伸。引琴彈秋思。

和順之琴者

陰陰花院月。耿耿蘭房燭。中有弄琴人。聲貌俱如玉。清冷石泉引。澹泞風松曲。遂使君子心。不愛凡絲竹。感舊寫真

李放寫我真。寫來二十載。莫問真何如。畫亦銷光彩。朱顏與玄鬢。日夜改復改。無嗟貌遽非。且喜身猶在。授太子賓客歸洛 自此後東都作

秋池二首

身閑無所爲。心閑無所思。況當故園夜。復此新秋池。岸闌烏棲後。橋明月出時。菱風香散漫。桂露光參差。靜境多獨得。幽懷竟誰知。悠然心中語。自問來何遲。

又一首

朝衣薄且健。晚簟清仍滑。社近燕影稀。雨餘蟬聲歇。閑中得詩境。此境幽難說。露荷珠自傾。風竹玉相夏。

誰能一同宿。共翫新秋月。暑退早涼歸。池邊好時節。

中隱

大隱住朝市。小隱入丘樊。丘樊太冷落。朝市太囂諠。不如作中隱。隱在留司官。似出復似處。非忙亦非閑。不勞心與力。又免飢與寒。終歲無公事。隨月有俸錢。君若好登臨。城南有秋山。君若愛遊蕩。城東有春園。君若欲一醉。時出赴賓筵。洛中多君子。可以恣歡言。君若欲高臥。但自深掩關。亦無車馬客。造次到門前。人生處一世。其道難兩全。賤卽苦凍餒。貴則多憂患。唯此中隱士。致身吉且安。窮通與豐約。正在四者間。

問秋光

殷卿領北鎮。崔尹開南幕。外事信爲榮。中懷未必樂。何如不才者。兀兀無所作。不引窗下琴。卽舉池上酌。淡交唯對水。老伴無如鶴。自適頗從容。旁觀誠濩落。身心轉恬泰。煙景彌淡泊。迴首語秋光。東來應不錯。

引泉

一爲止足限。二爲衰疾牽。邴罷不因事。陶歸非待年。歸來嵩洛下。閉戶何翛然。靜掃林下地。閑疏池畔泉。伊流狹似帶。洛石大如拳。誰教明月下。爲我聲濺濺。竟夕舟中坐。有時橋上眠。何用施屏障。水竹繞牀前。

知足吟 和崔十八未貧作

不種一壠田。倉中有餘粟。不採一枝桑。箱中有餘服。官閑離憂患。身泰無羈束。中人百戶稅。賓客一年祿。樽中不乏酒。籬下仍多菊。是物皆有餘。非心無所欲。吟君未貧作。因歌知足曲。自問此時心。不足何時足。

酬集賢劉郎中對月見寄兼懷元浙東

月在洛陽天。天高淨如水。下有白頭人。擊衣中夜起。思遠鏡亭上。光深書殿裏。眇然三處心。相去各千里。

太湖石

遠望老嵯峨。近觀怪嶸崕。才高八九尺。勢若千萬尋。嵌空華陽洞。重疊匡山岑。逸矣仙掌迴。牙然劍門深。形質冠今古。氣色通清陰。未秋已瑟瑟。欲雨先沈沈。天姿信爲異。時用非所任。磨刀不如礪。擣帛不如砧。何乃主人意。重之如萬金。豈伊造物者。獨能知我心。

偶作二首

擾擾貪生人。幾何不天闕。遑遑愛名人。幾何能貴達。伊余信多幸。拖紫垂白髮。身爲三品官。年已五十八。筋骸雖早衰。尙未苦羸憊。資產雖不豐。亦不甚貧竭。登山力猶在。遇酒興時發。無事日月長。不羈天地闊。安身有處所。適意無時節。解帶松下風。抱琴池上月。人間所重者。相印將軍鉞。謀慮繫安危。威權主生殺。懣心一身苦。炙手旁人熱。未必方寸間。得如吾快活。

又一首

日出起鹽櫛。振衣入道場。寂然無他念。但對一爐香。日高始就食。食亦非膏粱。精粗隨所有。亦足飽充腸。日午脫巾簪。燕息窗下牀。清風颯然至。臥可致羲皇。日西引杖履。散步遊林塘。或飲茶一盞。或吟詩一章。日入多不食。有時唯命觴。何以送閑夜。一曲秋霓裳。一日分五時。作息率有常。自喜老後健。不嫌閑中忙。是非一以貫。身世交相忘。若問此何許。此是無何鄉。

普池上舊亭

池月夜淒涼。池風曉蕭颯。欲入池上冬。先葺池中閣。向暖窗戶開。迎寒簾幕合。苔封舊瓦木。水照新朱蠟。軟火深土爐。香醪小瓷榼。中有獨宿翁。一燈對一榻。

崔十八新池

愛君新小池。池色無人知。見底月明夜。無波風定時。忽看不似水。一派寒琉璃。

翫止水

動者樂流水。靜者樂止水。利物不如流。鑒形不如止。淒清早霜降。淅瀝微風起。中面紅葉開。四隅綠萍委。廣狹八九丈。灣環有涯涘。淺深三四尺。洞徹無表裏。淨分鶴翹足。澄見魚掉尾。迎眸洗眼塵。隔胸蕩心滓。定將禪不別。明與誠相似。清能律貪夫。淡可交君子。豈唯空狎翫。亦取相倫擬。欲識靜者心。心源祇如此。

聞崔十八宿予新昌弊宅。時予亦宿崔家。依仁新亭。一宵偶同。兩興暗合。因而成詠。聊以寫懷。

陋巷掩弊廬。高居敞華屋。新昌七株松。依仁萬莖竹。松前月臺白。竹下風池綠。君向我齋眠。我在君亭宿。平生有微尚。彼此多幽獨。何必本主人。兩心聊自足。

日長

日長晝加飧。夜短朝餘睡。春來寢食間。雖老猶有味。林塘得芳景。園曲生幽致。愛水多棹舟。惜花不掃地。幸無眼下病。且向樽前醉。身外何足言。人間本無事。

三月三十日作

今朝三月盡。寂寞春事畢。黃鳥漸無聲。朱櫻新結實。臨風獨長歎。此歎意非一。半百過九年。豔陽殘一日。

隨年減歡笑。逐日添衰疾。且道花下歌。送此杯中物。

慵不能

架上非無書。眼慵不能看。匣中亦有琴。手慵不能彈。腰慵不能帶。頭慵不能冠。午後恣情寢。午時隨事殮。一殮終日飽。一寢至夜安。飢寒亦閑事。況乃不飢寒。

晨興

宿鳥動前林。晨光上東屋。銅爐添早香。紗籠滅殘燭。頭醒風稍愈。眼飽睡初足。起坐兀無思。叩齒三十六。何以解宿齋。一杯雲母粥。

朝課

平甃白石渠。靜掃青苔院。池上好風來。新荷大如扇。小亭中何有。素琴對黃卷。藥珠諷數篇。秋思彈一遍。從容朝課畢。方與客相見。

天竺寺七葉堂避暑

鬱鬱復鬱鬱。伏熱何時畢。行入七葉堂。煩暑隨步失。簷雨稍霏微。窗風正蕭瑟。清宵一覺睡。可以銷百疾。

香山寺石樓潭夜浴

炎光晝方熾。暑氣宵彌毒。搖扇風甚微。袞裳汗霏漉。起向月中行。來向潭上浴。平石爲浴牀。窪石爲浴斛。綃巾薄露頂。草屨輕乘足。清涼詠而歸。歸上石樓宿。

嗟髮落

朝亦嗟髮落。暮亦嗟髮落。盡誠可嗟。盡來亦不惡。既不勞洗沐。又不煩梳掠。最宜溼暑天。頭輕無結縛。脫置垢巾幘。解去塵纓絡。銀瓶貯寒泉。當頂傾一勺。有如醍醐灌。坐受清涼樂。因悟自在僧。亦資於剗削。安穩眠。

家雖日漸貧。猶未苦飢凍。身雖日漸老。幸無急病痛。眼逢鬧處合。心向閑時用。既得安穩眠。亦無顛倒夢。池上夜境。

晴空星月落池塘。澄鮮淨綠表裏光。露篔清瑩迎夜滑。風襟蕭灑先秋涼。無人驚處野禽下。新睡覺時幽草香。但問塵埃能去否。濯纓何必向滄浪。

書紳

仕有職役勞。農有吠畝勤。優哉分司叟。心力無苦辛。歲晚頭又白。自問何欣欣。新酒始開瓮。舊穀猶滿囷。吾嘗靜自思。往往夜達晨。何以送吾老。何以安吾貧。歲計莫如穀。飽則不干人。日計莫如醉。醉則兼忘身。誠知有道理。未敢勸交親。恐爲人所哂。聊自書諸紳。

秋遊平泉贈韋處士閑禪師

秋景引閑步。山遊不知疲。杖藜捨輿馬。十里與僧期。昔嘗憂六十。四體不支持。今來已及此。猶未苦衰羸。心興遇境發。身力因行知。尋雲到起處。愛泉聽滴時。南村韋處士。西寺閑禪師。山頭與澗底。聞健且相隨。遊坊口懸泉偶題石上。時爲河南尹。

濟源山水好。老尹知之久。常日聽人言。今秋入吾手。孔山刀劍立。沁水龍蛇走。危磴上懸泉。澄灣轉坊口。

盧明見心底。淨綠無纖垢。仙棹浪悠揚。塵纓風斗藪。巖寒松柏短。石古莓苔厚。錦座映高低。翠屏張左右。雖無安石妓。不乏文舉酒。談笑逐身來。管絃隨事有。時逢杖錫客。或值垂綸叟。相與澹忘歸。自辰將及酉。公門欲返駕。溪路猶迴首。早晚重來遊。心期罷官後。

對火翫雪

平生所心愛。愛火兼憐雪。火是臘天春。雪爲陰夜月。鵝毛紛正墮。獸炭敲初折。盈尺白鹽寒。滿爐紅玉熱。稍宜杯酌動。漸引笙歌發。但識歡來由。不知醉時節。銀盤堆柳絮。羅袖搏瓊屑。共愁明日銷。便作經年別。

六年寒食洛下宴遊贈馮李二少尹

豐年寒食節。美景洛陽城。三尹皆強健。一日盡晴明。東郊蹋青草。南園攀紫荆。風坼海榴豔。露墜木蘭英。假開春未老。宴合日屢傾。珠翠混花影。管絃藏水聲。佳會不易得。良辰亦難并。聽吟歌暫輟。看舞杯徐行。米價賤如土。酒味濃於餠。此時不盡醉。但恐負平生。殷勤二曹長。各捧一銀觥。

苦熱中寄舒員外

何堪日衰病。復此時炎燠。厭對俗杯盤。倦聽凡絲竹。藤牀鋪晚雪。角枕截寒玉。安得清瘦人。新秋夜同宿。非君固不可。何夕枉高躅。

閑夕

一聲早蟬發。數點新螢度。蘭缸耿無烟。筠簟清有露。未歸後房寢。且下前軒步。斜月入低廊。涼風滿高樹。放懷常自適。遇境多成趣。何法使之然。心中無細故。

寄情

灼灼早春梅。東南枝最早。持來翫未足。花向手中老。芳香銷掌握。悵望生懷抱。豈無後開花。念此先開好。舒員外遊香山寺。數日不歸。兼辱尺書。大誇勝事。時正值坐衙。慮囚之際。走筆題長句以贈之。香山石樓倚天開。翠屏壁立波環迴。黃菊繁時好客到。碧雲合處佳人來。酩顏一笑天桃綻。清吟數聲寒玉哀。軒騎送遲棹容與。留連三日不能回。白頭老尹府中坐。早衙纔退暮衙催。庭前階上何所有。疊因成貫案成堆。豈無池塘長秋草。亦有絲竹生塵埃。今日清光昨夜月。竟無人來勸一杯。

早冬遊王屋。自靈都抵陽臺上。方望天壇。偶吟成章。寄溫谷周尊師。中書李相公。

霜降山水清。王屋十月時。石泉碧漾漾。巖樹紅離離。朝爲靈都遊。暮有陽臺期。飄然世塵外。鸞鶴如可追。忽念公程盡。復慚身力衰。天壇在天半。欲上心遲遲。嘗聞此遊者。隱客與損之。各抱貴仙骨。俱非泥垢姿。二人相顧言。彼此稱男兒。若不爲松喬。卽須作臯夔。今果如其語。光彩雙葳蕤。一人佩金印。一人翳玉芝。我來高其事。詠歎偶成詩。爲君題石上。欲使故山知。

濟源上枉舒員外兩篇。因酬六韻。

歇手不判案。舉頭仍見山。雖來鞍馬上。不離詩酒間。濟源三臨泛。王屋一登攀。猶嫌百里近。祇得十日閑。明朝却歸府。塵事如循環。賴聽瑤華唱。稍開風土顏。

吳宮辭

淡紅花。軟淺檀蛾。睡臉初開似翦波。坐對珠籠閑理曲。琵琶鸚鵡語相和。

卷五十三

律詩 凡一百首

元微之除浙東觀察使喜得杭越鄰州先贈長句。

稽山鏡水歡遊地。犀帶金章榮貴身。官職比君雖校小。封疆與我且爲鄰。郡樓對翫千峯月。江界平分兩岸春。杭越風光詩酒主。相看更合是何人。

席上答微之

我住浙江西。君去浙江東。勿言一水隔。便與千里同。富貴無人勸君酒。今宵爲我盡盃中。

答微之上船後留別

燭下樽前一分手。舟中岸上兩迴頭。歸來虛白堂中夢。合眼先應到越州。

答微之泊西陵驛見寄

烟波盡處一點白。應是西陵古驛臺。知在臺邊望不見。暮潮空送渡船迴。

答微之誇越州州宅

賀上人迴得報書。大誇州宅似仙居。厭看馮翊風沙久。喜見蘭亭烟景初。日出旌旗生氣色。月明樓閣在空虛。知君暗數江南郡。除却餘杭盡不如。

微之重誇州居其落句有西州羅刹之謔。因嘲茲石聊以寄懷。

君問西州城下事。醉中疊紙爲君書。嵌崆石面標羅刹。壓捺潮頭敵子胥。神鬼曾鞭猶不動。波濤雖打欲何如。誰知太守心相似。抵滯堅頑兩有餘。

張十八員外以新詩二十五首見寄。郡樓月下吟翫通夕。因題卷後封寄微之。

秦城南省清秋夜。江郡東樓明月時。去我三千六百里。得君二十五篇詩。陽春曲調高難和。淡水交情老始知。坐到天明吟未足。重封轉寄與微之。

酬微之

滿裘填箱唱和詩。少年爲戲老成悲。聲聲麗曲敲寒玉。句句妍辭綴色絲。吟翫獨當明月夜。傷嗟同是白頭時。由來才命相磨折。天遣無兒欲怨誰。

餘思未盡。加爲六韻重寄微之。

海內聲華併在身。篋中文字絕無倫。遙知獨對封章草。忽憶同爲獻納臣。走筆往來盈卷軸。除官遍互掌絲綸。制從長慶辭高古。詩到元和體變新。各有文姬才稚齒。俱無通子繼餘塵。琴書何必求王粲。與女猶勝與外人。

答微之詠懷見寄

關中同直前春事。船裏相逢昨日情。分袂二年勞夢寐。並牀三宿話平生。紫微北畔辭宮闕。滄海西頭對郡城。聚散窮通何足道。醉來一曲放歌行。

酬微之誇鏡湖

我嗟身老歲方徂。君更官高興轉孤。軍門郡閣曾閑否。禹穴耶溪得到無。酒盡省陪波卷白。骰盆思共彩呼盧。一泓鏡水誰能羨。自有胸中萬頃湖。

雪中卽事寄微之

連夜江雲黃慘澹。平明山雪白模糊。銀河沙漲三千里。梅嶺花排一萬株。北市風生飄散麵。東樓日出照凝蘇。誰家高士關門戶。何處行人失道途。舞鶴庭前毛稍定。擣衣砧上練新鋪。戲團稚女呵紅手。愁坐衰翁對白鬚。壓瘴一州除疾苦。呈豐萬井盡歡娛。潤含玉德懷君子。寒助霜威憶丈夫。莫道烟波一水隔。何妨氣候兩鄉殊。越中地暖多成雨。還有瑤臺瓊樹無。

醉封詩筒寄微之

一生休戚與窮通。處處相隨事事同。未死又鄰滄海郡。無兒俱作白頭翁。展眉只仰三杯後。代面唯憑五字中。爲向兩川郵吏道。莫辭來去遞詩筒。

除夜寄微之

鬢毛不覺白毵毵。一事無成百不堪。共惜盛時辭闕下。同嗟除夜在江南。家山泉石尋常憶。世路風波子細諳。老校於君合先退。明年半百又加三。

蘇州李中丞以元日郡齋感懷詩寄微之及予。輒依來篇七言八韻走筆奉答。兼呈微之。

白首餘杭白太守。落拓拋名來已久。一辭渭北故園春。再把江南新歲酒。杯前笑歌徒勉強。鏡裏形容漸衰朽。領郡慚當潦倒年。鄰州喜得平生友。長洲草接松江岸。曲水花連鏡湖口。老去還能痛飲無。春來曾

作閑遊否。憑鶯傳語報李六。倩鴈將書與元九。莫嗟一日日催人。且貴一年年入手。

早春西湖閑遊。恨然興懷。憶與微之同賞。因思在越官重事殷。鏡湖之遊。或恐未暇。偶成十八韻寄微之。

上馬復呼賓。湖邊景氣新。管絃三數事。騎從十餘人。立換登山屐。行攜灑酒巾。逢花看當妓。遇草坐爲茵。西日籠黃柳。東風蕩白蘋。小橋裝鴈齒。輕浪整魚鱗。畫舫牽徐轉。銀船酌慢巡。野情遺世累。醉態任天真。彼此年將老。平生分最親。高天從所願。遠地得爲鄰。雲樹分三驛。烟波限一津。翻嗟寸步隔。却厭尺書頻。浙右稱雄鎮。山陰委重臣。貴垂長紫綬。榮駕大朱輪。出動刀槍隊。歸生道路塵。鴈驚弓易散。鷗怕鼓難馴。百吏瞻相面。千夫捧擁身。自然閑興少。應負鏡湖春。

答微之見寄

可憐風景浙東西。先數餘杭次會稽。禹廟未勝天竺寺。錢湖不羨若耶溪。擺塵野鶴春毛暖。拍水沙鷗濕翅低。更對雪樓君愛否。紅欄碧甃點銀泥。

祭社宵興燈前偶作

城頭傳鼓角。燈下整衣冠。夜鏡藏鬚白。秋泉漱齒寒。欲將閑送老。須著病辭官。更待年終後。支持歸臥看。

閑臥

盡日前軒臥。神閑境亦空。有山當枕上。無事到心中。簾卷侵牀日。屏遮入座風。望春春未到。應在海門東。

新春江次

浦乾潮未應。堤濕凍初銷。粉片粧梅朵。金絲刷柳條。鴨頭新綠水。鴈齒小紅橋。莫怪珂聲碎。春來五馬驕。

春題湖上

湖上春來似畫圖。亂峯圍繞水平鋪。松排山面千重翠。月點波心一顆珠。碧毯線頭抽早稻。青羅裙帶展新蒲。未能拋得杭州去。一半勾留是此湖。

早春憶微之

昏昏老與病相和。感物思君歎復歌。聲早雞先知夜短。色濃柳最占春多。沙頭雨染斑斑草。水面風驅瑟瑟波。可道眼前光景惡。其如難見故人何。

失鶴

失爲庭前雪。飛因海上風。九霄應得侶。三夜不歸籠。聲斷碧雲外。影沈明月中。郡齋從此後。誰伴白頭翁。

自感

宴遊寢食漸無味。杯酒管絃徒繞身。賓客歡娛僮僕飽。始知官職爲他人。得湖州崔十八使君書。喜與杭越鄰郡。因成長句代賀。兼寄微之。

三郡何因此結緣。貞元科第忝同年。故情歡喜開書後。舊事思量在眼前。越國封疆吞碧海。杭城樓閣入青烟。吳興卑小君應屈。爲是蓬萊最後仙。

同諸客攜酒早看櫻桃花

曉報櫻桃發。春攜酒客過。綠錫粘盞杓。紅雪壓枝柯。天色清明少。人生事故多。停杯替花語。不醉擬如何。

柳絮

三月盡時頭白日。與春老別更依依。憑鶯爲向楊花道。絆惹春風莫放歸。

早飲湖州酒寄崔使君

一棹扶頭酒。泓澄瀉玉壺。十分蘸甲酌。激灑滿銀盃。捧出光華動。嘗看氣味殊。手中稀琥珀。舌上冷醍醐。瓶裏有時盡。江邊無處沽。不知崔太守。更有寄來無。

病中書事

三載臥山城。閑知節物情。鶯多過春語。蟬不待秋鳴。氣嗽因寒發。風痰欲雨生。病身無所用。唯解卜陰晴。與微之唱和。來去常以竹筒貯詩。陳協律美而成篇。因此答。

揀得琅玕截竹筒。緘題章句寫心胸。隨風每喜飛如鳥。渡水常憂化作龍。粉節堅如太守信。霜筠冷稱大夫容。煩君讚詠心知愧。魚目驪珠同一封。

醉戲諸妓

席上爭飛使君酒。歌中多唱舍人詩。不知明日休官後。逐我東山去是誰。

北院

北院人稀到。東窗地最偏。竹烟行竈上。石壁臥房前。性拙身多暇。心慵事少緣。還如病居士。唯置一牀眠。

酬周協律

五十錢塘守。應爲送老官。濫蒙辭客愛。猶作近臣看。鑿落愁須飲。琵琶悶遣彈。白頭雖強醉。不似少年歡。

題石山人

騰騰兀兀在人間。貴賤賢愚盡往還。羶膩筵中唯飲酒。歌鐘會處獨思山。存神不許三尸住。混俗無妨兩鬢斑。除却餘杭白太守。何人更解愛君閑。

詩解

新篇日日成。不是愛聲名。舊句時時改。無妨悅性情。但令長守郡。不覓却歸城。祇擬江湖上。吟哦過一生。

潮

早潮纔落晚潮來。一月周流六十迴。不獨光陰朝復暮。杭州老去被潮催。

聞歌妓唱嚴郎中詩。因以絕句寄之。

已留舊政布中和。又付新詞與豔歌。但是人家有遺愛。就中蘇小感恩多。

柘枝妓

平鋪一合錦筵開。連擊三聲畫鼓催。紅蠟燭移桃葉起。紫羅衫動柘枝來。帶垂鈿胯花腰重。帽轉金鈴雪面迴。看卽曲終留不住。雲飄雨送向陽臺。

急樂世辭

正抽碧線繡紅羅。忽聽黃鸝斂翠蛾。秋思冬愁春悵望。大都不稱意時多。

天竺寺送堅上人歸廬山

錫杖登高寺。香爐憶舊峯。偶來舟不繫。忽去鳥無蹤。豈要留離偈。寧勞動別容。與師俱是夢。夢裏暫相逢。

除官赴闕偶贈微之

去年十月半。君來過浙東。今年五月盡。我發向闕中。兩鄉默默心相別。一水盈盈路不通。從此津人應省事。寂寥無復遞詩筒。

留題郡齋

吟山歌水嘲風月。便是三年官滿時。春爲醉眠多閉閣。秋因晴望暫褰帷。更無一事移風俗。唯化州民解詠詩。

別州民

耆老遮歸路。壺漿滿別筵。甘棠無一樹。那得淚潸然。稅重多貧戶。農飢足旱田。唯留一湖水。與汝救凶年。

登題天竺靈隱兩寺

在郡六百日。入山十二迴。宿因月桂落。醉爲海榴開。黃紙除書到。青宮詔命催。僧徒多悵望。賓從亦徘徊。寺暗烟埋竹。林香雨落梅。別橋憐白石。辭洞戀青苔。漸出松間路。猶飛馬上杯。誰教冷泉水。送我下山來。

西湖留別

征途行色慘風烟。祖帳離聲咽管絃。翠黛不須留五馬。皇恩祇許住三年。綠藤陰下鋪歌席。紅藕花中泊妓船。處處迴頭盡堪戀。就中難別是湖邊。

重寄別微之

憑仗江波寄一辭。不須惆悵報微之。猶勝往歲峽中別。灑灑堆邊招手時。

重題別東樓

東樓勝事我偏知。氣象多隨昏旦移。湖卷衣裳白重疊。山張屏障綠參差。海仙樓塔晴方出。江女笙簫夜始吹。春雨星攢尋蟹火。秋風霞颭弄濤旗。宴宜雲髻新梳後。曲愛霓裳未拍時。太守三年嘲不盡。郡齋空作百篇詩。

別周軍事

主人頭白官仍冷。去後憐君是底人。試謁會稽元相去。不妨相見却殷勤。

看常州柘枝贈賈使君

莫惜新衣舞柘枝。也從塵污汗霑垂。料君卽却歸朝去。不見銀泥衫故時。

汴河路有感

三十年前路。孤舟重往還。繞身新眷屬。舉日舊鄉關。事去唯留水。人非但見山。啼襟與愁鬢。此日兩成斑。

壩橋舊業

別業壩城北。拋來二十春。改移新逕路。變換舊村鄰。有稅田疇薄。無官弟姪貧。田園何用問。強半屬他人。

茅成驛

汴河無景思。秋日又淒淒。地薄桑麻瘦。村貧屋舍低。早苗多間草。濁水半和泥。最是蕭條處。茅成驛向西。

河陰夜泊憶微之

憶君我正泊行舟。望我君應上郡樓。萬里月明同此夜。黃河東面海西頭。

杭州迴舫

自別錢塘山水後。不多飲酒懶吟詩。欲將此意憑迴棹。與報西湖風月知。

途中題山泉

決決涌巖穴。濺濺出洞門。向東應入海。從此不歸源。似葉飄辭樹。如雲斷別根。吾身亦如此。何日返鄉園。

欲到東洛得楊使君書。因此報

向公心切向財疎。淮上休官洛下居。三郡政能從獨步。十年生計復何如。使君灘上久分手。別駕渡頭先得書。且喜平安又相見。其餘外事盡空虛。

洛下寓居

秋館清涼日。書因解悶看。夜窗幽獨處。琴不爲人彈。遊宴慵多廢。趨朝老漸難。禪僧教斷酒。道士勸休官。渭曲莊猶在。錢塘俸尙殘。如能便歸去。亦不至飢寒。

味道

叩齒晨興秋院靜。焚香宴坐晚窗深。七篇真誥論仙事。一卷壇經說佛心。此日盡知前境妄。多生曾被外塵侵。自嫌習性猶殘處。愛詠閑詩好聽琴。

好聽琴

本性好絲桐。塵機聞卽空。一聲來耳裏。萬事離心中。清暢堪銷疾。恬和好養蒙。尤宜聽三樂。安慰白頭翁。

愛詠詩

辭章諷詠成千首。心行歸依向一乘。坐倚繩牀閑自念。前生應是一詩僧。

酬皇甫庶子見寄

掌綸不稱君應笑。典郡無能我自知。別詔忽驚新命出。同寮偶與夙心期。春坊瀟灑優閑地。秋鬢蒼浪老大時。獨占二疏應未可。龍樓見擬覓分司。

臥疾

閑官臥疾絕經過。居處蕭條近洛河。水北水南秋月夜。管絃聲少杵聲多。

遠師

東宮白庶子。南寺遠禪師。何處遙相見。心無一事時。

問遠師

葷羶停夜食。吟詠散秋懷。笑問東林老。詩應不破齋。

小院酒醒

酒醒閑獨步。小院夜深涼。一領新秋簾。三間明月廊。未收殘盞杓。初換熟衣裳。好是幽眠處。松陰六尺牀。

贈侯三郎中

老愛東都好寄身。足泉多竹少埃塵。年豐最喜唯貧客。秋冷先知是瘦人。幸有琴書堪作伴。苦無田宅可爲鄰。洛中縱未長居得。且與蘇田遊過春。

求分司東都寄牛相公十韻

忽忽心如夢。星星鬢似絲。縱貧長有酒。雖老未拋詩。儉薄身都慣。疎頑性頗宜。飯盞飧亦飽。被暖起常遲。萬里歸何得。三年伴是誰。華亭鶴不去。天竺石相隨。王尹貫將馬。田家賣與池。開門閑坐日。遶水獨行時。懶慢交遊許。衰羸相府知。官寮幸無事。可惜不分司。

酬楊八

君以曠懷宜靜境。我因蹇步稱閑官。閉門足病非高士。勞作雲心鶴眼看。

履道新居二十韻

履道坊西角。官河曲北頭。林園四鄰好。風景一家秋。門閉深沈樹。池通淺沮溝。拔青松直上。鋪碧水平流。籬菊黃金合。窗筠綠玉稠。疑連紫陽洞。似到白蘋洲。僧至多同宿。賓來輒少留。豈無詩引興。兼有酒銷憂。移榻臨平岸。攜茶上小舟。果穿聞鳥啄。萍破見魚遊。地與塵相遠。人將境共幽。汎潭菱點鏡。沈浦月生鉤。廚曉烟孤起。庭寒雨半收。老飢初愛粥。瘦冷早披裘。洛下招新隱。秦中忘舊遊。辭章留鳳閣。班籍寄龍樓。病愜官曹靜。閑慚俸祿優。琴書中有得。衣食外何求。濟世才無取。謀身智不周。應須共心語。萬事一時休。九日思杭州舊遊。寄周判官及諸客。

忽憶郡南山頂上。昔時同醉是今辰。笙歌委曲聲延耳。金翠動搖光照身。風景不隨宮相去。歡娛應逐使君新。江山賓客皆如舊。唯是當筵換主人。

秋晚

煙景澹濛濛。池邊微有風。覺寒蛩近壁。知暝鶴歸籠。長貌隨年改。衰情與物同。夜來霜厚薄。梨葉半低紅。

分司

散帙留司殊有味。最宜病拙不才身。行香拜表爲公事。碧落青嵩當主人。已出閑遊多到夜。却歸慵臥又經旬。錢塘五馬留三匹。還擬騎遊攪擾春。

河南王尹初到以詩代書先問之

別來王閣老。三歲似須臾。鬢上班多少。杯前興有無。官從分緊慢。情莫問榮枯。許入朱門否。籃輿一病夫。

池西亭

朱欄映晚樹。金魄落秋池。還似錢塘夜。西樓月出時。

臨池閑臥

小竹圍庭匝。平池與砌連。閑多臨水坐。老愛向陽眠。營役拋身外。幽奇送枕前。誰家臥牀脚。解繫釣魚船。

吾廬

吾廬不獨貯妻兒。自覺年侵身力衰。眼下營求容足地。心中准擬掛冠時。新昌小院松當戶。履道幽居竹遶池。莫道兩都空有宅。林泉風月是家資。

題新居寄宣州崔相公

門庭有水巷無塵。好稱閑官作主人。冷似雀羅雖少客。寬於蝸舍足容身。疎通竹徑將迎月。掃掠莎臺欲待春。濟世料君歸未得。南園北曲謾爲鄰。

憶杭州梅花因敍舊遊寄蕭協律

三年閑悶在餘杭。曾爲梅花醉幾場。伍相廟邊繁似雪。孤山園裏麗如粧。蹋隨遊騎心長惜。折贈佳人手亦香。賞自初開直至落。歡因小飲便成狂。薛劉相次埋新隴。沈謝雙飛出故鄉。歌伴酒徒零散盡。唯殘頭白老蕭郎。

病中辱張常侍題集賢院詩。因以繼和。

天祿閣門開。甘泉侍從迴。圖書皆帝籍。寮友盡仙才。騎省通中掖。龍樓隔上臺。猶憐病宮相。詩寄洛陽來。

早春晚歸

晚歸騎馬過天津。沙白橋紅反照新。草色連延多隙地。鼓聲閑緩少忙人。還如南國饒溝水。不似西京足路塵。金谷風光依舊在。無人管領石家春。

贈楊使君

曾嗟放逐同巴峽。且喜歸還會洛陽。時命到來須作用。功名未立莫思量。銀銜叱撥欺風雪。金屑琵琶費酒漿。更待城東桃李發。共君沈醉兩三場。

贈皇甫庶子

何因散地共徘徊。人道君才我不才。騎少馬蹄生易蹶。用稀印鑱澀難開。妻知年老添衣絮。婢報天寒撥酒醅。更愧小胥諮拜表。單衫衝雪夜深來。

池上竹下作

穿籬遶舍碧逶迤。十畝閑居半是池。食飽窗閒新睡後。脚輕林下獨行時。水能性淡爲吾友。竹解心虛卽

我師何必悠悠世上。勞心費目覓親知。

閑出覓春戲贈諸郎官

年來數出覓風光。亦不全閑亦不忙。放鞚體安騎穩馬。隔袍身暖照晴陽。迎春日日添詩思。送老時時放酒狂。除却髭鬚白一色。其餘未伏少年郎。

別春爐

煖閣春初入。溫爐與稍闌。晚風猶冷在。夜火且留看。獨宿相依久。多情欲別難。誰能共天語。長遣四時寒。

汎小輪二首

水一塘。船一隻。輪頭漾漾知風起。輪背蕭蕭聞雨滴。醉臥船中欲醒時。忽疑身是江南客。船緩進。水平流。一莖竹篙剔船尾。兩幅青幕幅船頭。亞竹亂藤多照岸。如從鳳口向湖州。

夢行簡

天氣妍和水色鮮。閑吟獨步小橋邊。池塘草綠無佳句。虛臥春窗夢阿憐。

題新居呈王尹兼簡府中三掾

弊宅須重葺。貧家乏羨財。橋憑川守造。樹倩府寮栽。朱板新猶溼。紅英暖漸開。仍期更攜酒。倚檻看花來。

雲和

非琴非瑟亦非箏。撥柱推絃調未成。欲散白頭千萬恨。祇銷紅袖兩三聲。

春老

欲隨年少強遊春。自覺風光不屬身。歌舞屏風花障上。幾時曾畫白頭人。
春雪過皇甫家

晚來監輿雪中迴。喜遇君家門正開。唯要主人青眼待。琴詩談笑自將來。
崔侍御以孩子三日示其所生詩見示。因以二絕和之。

洞房門上掛桑弧。香水盆中浴鳳鳩。還似初生三二魄。常娥滿月卽成珠。
愛惜肯將同寶玉。喜歡應勝得王侯。弄璋詩句多才思。愁殺無兒老鄧攸。

與皇甫庶子同遊城東

閑遊何必多徒侶。相勸時時舉一杯。博望苑中無職役。建春門外足池臺。
綠油剪葉蒲新長。紅蠟粘枝杏欲開。白馬朱衣兩宮相。可憐天氣出城來。

洛城東花下作

記得舊詩章。花多數洛陽。及逢枝似雪。已是鬢成霜。向後光陰促。從前事意忙。
無因重年少。何計駐時芳。欲送愁離面。須傾酒入腸。白頭無藉在。醉倒亦何妨。

晚春寄微之并崔湖州

洛陽陌上少交親。履道城邊欲暮春。崔在吳興元在越。出門騎馬覓何人。

城東閑行因題尉遲司業水閣

閑遶洛陽城。無人知姓名。病乘籃輿出。老著茜衫行。處處花相引。時時酒一傾。
借君溪閣上。醉詠兩三聲。

寄皇甫七

盡夏愛吾廬。陶潛語不虛。花樽飄落酒。風案展開書。鄰女偷新果。家僮澆小魚。不知皇甫七。池上興如何。

訪皇甫七

上馬行數里。逢花傾一杯。更無停泊處。還是覓君來。

卷五十四

律詩 凡一百首

除蘇州刺史別洛城東花

亂雪千花落。新絲兩鬢生。老除吳郡守。春別洛陽城。江上今重去。城東更一行。別花何用伴。勸酒有殘鶯。

奉和汴州令狐令公二十二韻

客有東征者。夷門一落帆。二年方得到。五日未爲淹。在浚旌重葺。遊梁館更添。心因好善樂。貌爲禮賢謙。俗阜知敦勸。民安見察廉。仁風扇道路。陰雨膏閭閻。文律操將柄。兵機釣得鈐。碧幢油葉葉。紅旆火襜襜。景象春加麗。威容曉助嚴。槍森赤豹尾。纛吐黑龍髯。門靜塵初斂。城昏日半銜。選幽開後院。占勝坐前簷。平展絲頭毯。高褰錦額廉。雷飀柘枝鼓。雪擺胡騰衫。髮滑歌斂墜。粧光舞汗霑。迴燈花蔌蔌。過酒玉纖纖。饌盛盤心殫。醑濃盞底粘。陸珍熊掌爛。海味蟹螯鹹。福履千夫祝。形儀四坐瞻。羊公長在峴。傳說莫歸巖。眷愛人人遍。風情事事兼。猶嫌客不醉。同賦夜厭厭。

船夜援琴

鳥棲魚不動。月照夜江深。身外都無事。卅中祇有琴。七絃爲益友。兩耳是知音。心靜卽聲淡。其間無古今。

答劉和州

換印雖頻命未通。歷陽湖上又秋風。不教才展休明代。爲罰詩爭造化功。我亦思歸田舍下。君應厭臥郡齋中。好相收拾爲閑伴。年齒官班約略同。

渡淮

淮水東南闊。無風渡亦難。孤烟生乍直。遠樹望多圓。春浪棹聲急。夕陽帆影殘。清流宜映月。今夜重吟看。

赴蘇州至常州答賈舍人

杭城隔歲轉蘇臺。還擁前時五馬迴。厭見簿書先眼合。喜逢杯酒暫眉開。未酬恩寵年空去。欲立功名命不來。一別承明三領郡。甘從人道是粗才。

去歲罷杭州。今春領吳郡。慚無善政。聊寫鄙懷。兼寄三相公。

爲問三丞相。如何秉國鈞。那將最劇郡。付與苦慵人。豈有吟詩客。堪爲持節臣。不才空飽煖。無惠及飢貧。昨臥南城月。今行北境春。鉛刀磨欲盡。銀印換何頻。杭老遮車轍。吳童掃路塵。虛迎復虛送。慚見兩州民。

宣武令狐相公以詩寄贈。傳播吳中。聊用短章。用伸酬謝。

新詩傳詠忽紛紛。楚老吳娃耳徧聞。盡解呼爲好才子。不知官是上將軍。辭人命薄多無位。戰將功高少有文。謝眺篇章韓信鉞。一生雙得不如君。

自詠

形容瘦薄詩情苦。豈是人間有相人。只合一生眠白屋。何因三度擁朱輪。金章未佩雖非貴。銀槿常攜亦不貧。唯是無兒頭早白。被天磨折恰平均。

吟前篇因寄微之

君顏貴茂不清羸。君句雄華不苦悲。何事遣君還似我。髭鬚早白亦無兒。

紫薇花

紫薇花對紫薇翁。名目雖同貌不同。獨占芳菲當夏景。不將顏色託春風。潯陽官舍雙高樹。興善僧庭一大叢。何似蘇州安道處。花堂欄下月明中。

自到郡齋。僅經旬日。方專公務。未及宴遊。偷閑走筆題二十四韻。兼寄常州賈舍人。湖州崔郎中。仍呈吳中諸客。

渭北離鄉客。江南守土臣。涉途初改月。入境已經旬。甲郡標天下。環封極海濱。版圖十萬戶。兵籍五千人。自顧才能少。何堪寵命頻。冒榮慚印綬。虛獎負絲綸。候病須通脈。防流要塞津。救煩無若靜。補拙莫如勤。削使科條簡。攤令賦役均。以茲爲報効。安敢不躬親。襦袴提於手。韋弦佩在紳。敢辭稱俗吏。且願活疲民。常未徵黃霸。湖猶借寇恂。愧無鑑脚政。徒忝犬牙鄰。制詔誇黃絹。詩篇占白蘋。銅符拋不得。瓊樹見無因。警寐鐘傳夜。催衙鼓報晨。唯知對胥吏。未暇接親賓。色變雲迎夏。聲殘鳥過春。麥風非逐扇。梅雨異隨輪。武寺山如故。王樓月自新。池塘閑長草。絲竹廢生塵。暑遣燒神酎。晴教曬舞茵。待還公事了。亦擬樂吾身。

題籠鶴

經旬不飲酒。踰月未聞歌。豈是風情少。其如塵事多。虎丘慚客問。娃館妬人過。莫笑籠中鶴。相看去幾何。

答客問杭州

爲我踟躕停酒盞。與君約略說杭州。山名天竺堆青黛。湖號錢塘寫綠油。大屋簷多裝鴈齒。小航船亦畫龍頭。所嗟水路無三百。官繫何因得再遊。

登閩門閑望

閩門四望鬱蒼蒼。始覺州雄土俗強。十萬夫家供課稅。五千子弟守封疆。闔閭城碧鋪秋草。烏鵲橋紅帶夕陽。處處樓前飄管吹。家家門外泊舟航。雲埋虎寺山藏色。月耀娃宮水放光。曾賞錢塘兼茂苑。今來未敢苦誇張。

代諸妓贈送周判官

妓筵今夜別姑蘇。客棹明朝向鏡湖。莫汎扁舟尋范蠡。且隨五馬覓羅敷。蘭亭月破能迴否。娃館秋涼却到無。好與使君爲老伴。歸來休染白髭鬚。

秋寄微之十二韻

娃館松江北。稽成浙水東。屈君爲長吏。伴我作衰翁。旌旆知非遠。烟雲望不通。忙多對酒榼。興少閱詩筒。淡白秋來日。疎涼雨後風。餘霞數片綺。新月一張弓。影滿衰桐樹。香凋晚蕙叢。飢啼春穀鳥。寒怨絡絲蟲。覽鏡頭雖白。聽歌耳未聾。老愁從自遣。醉笑與誰同。清旦方堆案。黃昏始退公。可憐朝暮景。銷在兩衙中。

池上早秋

荷芰綠參差。新秋水滿池。早涼生北檻。殘照下東籬。露飽蟬聲懶。風乾柳意衰。過潘二十歲。何必更愁悲。

郡西亭偶詠

常愛西亭面北林。公私塵事不能侵。共閑作伴無如鶴。與老相隨祇有琴。莫遣是非分作界。須教吏隱合爲心。可憐此道人皆見。但要修行功用深。

故衫

闌淡緋衫稱老身。半披半曳出朱門。袖中吳郡新詩本。襟上杭州舊酒痕。殘色過梅看向盡。故香因洗嗅猶存。曾經爛熳三年著。欲棄空箱似少恩。

郡中夜聽李山人彈三樂

風琴秋拂匣。月戶夜開關。榮啓先生樂。姑蘇太守閑。傳聲千古後。得意一時間。却怪鍾期耳。唯聽水與山。

東城桂三首 并序

蘇之東城。古吳郡城也。今爲之樵牧場。有桂一株。生乎城下。惜其不得地。因賦三絕句以唁之。

子墮本從天竺寺。根盤今在闔閭城。當時應逐南風落。落向人間取次生。霜雪壓多雖不死。荆榛長疾欲相埋。長鬢落在樵人手。賣作蘇州一束柴。遙知天上桂華孤。試問嫦娥更要無。月宮幸有閑田地。何不中央種兩株。

聞行簡恩賜章服喜成長句寄之

吾年五十加朝散。爾亦今年賜服章。齒髮恰同知命歲。官銜俱是客曹郎。榮傳錦帳花聯萼。彩動綾袍鴈趁行。大抵著緋宜老大。莫嫌秋鬢數莖霜。

喚笙歌

露墜萎花槿。風吹敗葉荷。老心歡樂少。秋眼感傷多。芳歲今如此。衰翁可奈何。猶應不如醉。試遣喚笙歌。

對酒吟

一拋學士筆。三佩使君符。未換銀青綬。唯添雪白鬚。公門銜退掩。妓席客來鋪。履鳥從相近。謳吟任所須。金銜嘶五馬。細帶舞雙姝。不得當年有。猶勝到老無。合聲歌漢月。齊手拍吳歎。今夜還先醉。應煩紅袖扶。

偶飲

三盞醺醺四體融。妓亭簷下夕陽中。千聲方響敲相續。一曲雲和夏未終。今日心情如往日。秋風氣味似春風。唯憎小吏樽前報。道去銜時水五筒。

早發赴洞庭舟中作

闔門曙色欲蒼蒼。星月高低宿水光。棹舉影搖燈燭動。舟移聲拽管絃長。漸看海樹紅生日。遙見包山白帶霜。出郭已行十五里。唯銷一曲慢霓裳。

宿湖中

水天向晚碧沈沈。樹影霞光重疊深。浸月冷波千頃練。苞霜新橘萬株金。幸無案牘何妨醉。縱有笙歌不廢吟。十隻畫船何處宿。洞庭山脚太湖心。

揀貢橘書情

洞庭貢橘揀宜精。太守勤王請自行。珠顆形容隨日長。瓊漿氣味得霜成。登山敢惜驚駘力。望闕難伸螻蟻情。疎賤無由親跪獻。願憑朱寶表丹誠。

夜泛陽塢入明月灣卽事寄崔湖州

湖山處處好淹留。最愛東灣北塢頭。掩映橘林千點火。泓澄潭水一盆油。龍頭畫舸銜明月。鵲脚紅旗蘸碧流。爲報茶山崔太守。與君各是一家遊。

泛太湖書事寄微之

烟渚雲帆處處通。飄然舟似入虛空。玉盃淺酌巡初匝。金管徐吹曲未終。黃夾纈林寒有葉。碧琉璃水淨無風。避旗飛鷺翻翻白。驚鼓跳魚拔刺紅。澗雪壓多松偃蹇。巖泉滴久石玲瓏。書爲故事留湖上。吟作新詩寄浙東。軍府威容從道盛。江山氣色定知同。報君一事君應羨。五宿澄波皓月中。

題新館

曾爲白社羈遊子。今作朱門醉飽身。十萬戶州尤覺貴。二千石祿敢言貧。重裘每念單衣士。兼味常思旅食人。新館寒來多少客。欲迴歌酒煖風塵。

西樓喜雪命宴

宿雲黃慘澹。曉雪白飄颻。散麵遮槐市。堆花壓柳橋。四郊鋪縞素。萬室甃瓊瑤。銀榼攜桑落。金爐上麗譙。光迎舞妓動。寒近醉人銷。歌樂雖盈耳。慚無五袴謠。

新栽梅

池邊新種七株梅。欲到花時點檢來。莫怕長洲桃李妬。今年好爲使君開。

酬劉和州戲贈

錢塘山水接蘇臺。兩地褰帷愧不才。政事素無爭學得。風情舊有且將來。雙蛾解珮啼相送。五馬鳴珂笑却迴。不似劉郎無景行。長拋春恨在天台。

戲和賈常州醉中二絕句

聞道毗陵詩酒興。近來積漸學姑蘇。鬣頭新令從偷去。刮骨清吟得似無。越調管吹留客曲。吳吟詩送煖寒盃。娃宮無限風流事。好遣孫心暫學來。

歲暮寄微之三首

微之久別能無歎。知退書稀豈免愁。甲子百年過半後。光陰一歲欲終頭。池冰曉合膠船底。樓雪晴銷露瓦溝。自覺歡情隨日減。蘇州心不及杭州。白頭歲暮苦相思。除却悲吟無可爲。枕上從妨一夜睡。燈前讀盡十年詩。龍鍾校正騎驢日。顛頓通江司馬時。若並如今是全活。紆朱拖紫且開眉。榮進雖頻退亦頻。與君才命不調勻。若不九重中掌事。卽須千里外拋身。紫垣南北廳曾對。滄海東西郡又鄰。唯欠結廬嵩洛下。一時歸去作閑人。

歲日家宴。戲示弟姪等。兼呈張侍御二十八丈。殷判官二十三兄。

弟妹妻孥小姪甥。嬌癡弄我助歡情。歲盡後推藍尾酒。春盤先勸膠牙餠。形骸老倒雖堪歎。骨肉團圓亦可榮。猶有誇張少年處。笑呼張丈喚殷兄。

正月三日閑行

黃鸝巷口鶯欲語。烏鵲河頭冰欲銷。綠浪東西南北水。紅欄三百九十橋。鴛鴦蕩漾雙雙翅。楊柳交加萬萬條。借問春風來早晚。祇從今日到明朝。

夜歸

逐勝移朝宴。留歡放晚衙。賓寮多謝客。騎從半吳娃。到處銷春景。歸時及月華。城陰一道直。燭焰兩行斜。東吹先催柳。南霜不殺花。皁橋夜沽酒。燈火是誰家。

自歎

豈獨年相迫。兼爲病所侵。春來痰氣動。老去嗽聲深。眼暗猶操筆。頭班未挂簪。因循過日月。真是俗人心。郡中閑獨寄。微之及崔湖州。

少年賓旅非吾輩。晚歲簪纓束我身。酒散更無同宿客。詩成長作獨吟人。蘋洲會面知何日。鏡水離心又一春。兩處也應相憶在。官高年長少情親。

小舫

小舫一艘新造了。輕裝梁柱庫安蓬。深坊靜岸遊應遍。淺水低橋去盡通。黃柳影籠隨棹月。白蘋香起打頭風。慢牽欲傍櫻桃泊。借問誰家花最紅。

馬墜強出贈同座

足傷遭馬墜。腰重倩人擡。祇合窗間臥。何因花下來。坐依桃葉妓。行呷地黃盃。強出非他意。東風落盡梅。

夜聞買常州崔湖州茶山境會想羨歡宴因寄此詩

遙聞境會茶山夜。珠翠歌鍾俱遶身。盤下中分兩州界。燈前合作一家春。青娥遞舞應爭妙。紫筍齊嘗各鬪新。自歎花時北窗下。蒲黃酒對病眠人。

酬微之開拆新樓初畢相報末聯見戲之作

海山鬱鬱石稜稜。新豁高居正好登。南臨瞻郡三千界。東對蓬宮十二層。報我樓成秋望月。把君詩讀夜迴燈。無妨却有他心眼。粧點亭臺卽不能。

病中多雨逢寒食

水國多陰常懶出。老夫饒病愛閑眠。三旬臥度鶯花月。一半春銷風雨天。薄暮何人吹鬢篲。新晴幾處縛鞦韆。綵繩芳樹畏如舊。唯是年年換少年。

清明夜

好風隴月清明夜。碧砌紅軒刺史家。獨遶迴廊行復歇。遙聽紫管暗看花。

蘇州柳

金谷園中黃嬋娜。曲江亭畔碧婆娑。老來處處遊行徧。不似蘇州柳最多。絮撲白頭條拂面。使君無計奈春何。

三月二十八日贈周判官

一春惆悵殘三日。醉問周郎憶得無。柳絮送人鶯勸酒。去年今日別東都。

偶作

紅杏初生葉。青梅已綴枝。闌珊花落後。寂寞酒醒時。坐悶低眉久。行慵舉足遲。少年君莫怪。頭白自應知。

重答劉和州

分無佳麗敵西施。敢有文章替左司。隨分笙歌聊自樂。等閑篇詠被人知。花邊妓引尋香徑。月下僧留宿劍池。可惜當時好風景。吳王應不解吟詩。

奉送三兄

少年曾管二千兵。晝聽笙歌夜斫營。自反丘園頭盡白。每逢旗鼓眼猶明。杭州暮醉連牀臥。吳郡春遊並馬行。自愧阿連官職慢。祇教兄作使君兄。

城上夜宴

留春不住登城望。惜夜相將秉燭遊。風月萬家河兩岸。笙歌一曲郡西樓。詩聽越客吟何苦。酒被吳娃勸不休。從道主人都是夢。夢中歡笑亦勝愁。

重題小舫贈周從事兼戲微之

細蓬青篾織魚鱗。小眼紅窗襯麴塵。闊狹纔容從事座。高低恰稱使君身。舞筵須揀腰輕女。仙棹難勝骨重人。不似鏡湖廉使出。高橋大扁鬧驚春。

吳櫻桃

含桃最說出東吳。香色鮮穠氣味殊。恰恰舉頭千萬顆。婆娑拂面兩三株。烏儵飛處銜將火。人摘爭時踢破珠。可惜風吹兼雨打。明朝後日卽應無。

春盡勸客酒

林下春將盡。池邊日半斜。櫻桃落砌顛。夜合隔簾花。嘗酒留閑客。行茶使小娃。殘盃勸不飲。留醉向誰家。

仲夏齋居偶題八韻寄微之及崔湖州

腥血與葷蔬。停來一月餘。肌膚雖瘦損。方寸任清虛。體道通宵坐。頭慵隔日梳。眼前無俗物。身外卽僧居。水榭風來遠。松廊雨過初。褰簾放巢燕。投食施池魚。久別閑遊伴。頻勞問疾書。不知湖與越。吏隱與何如。

官宅

紅紫共紛紛。祇承老使君。移舟木蘭棹。行酒石榴裙。水色窗窗見。花香院院聞。戀他官舍住。雙鬢白如雲。

六月三日夜聞蟬

荷香清露墜。柳動好風生。微月初三夜。新蟬第一聲。乍聞愁北客。靜聽憶東京。我有竹林宅。別來蟬再鳴。不知池上月。誰撥小船行。

蓮石

青石一兩片。白蓮三四枝。寄將東洛去。心與物相隨。石倚風前樹。蓮栽月下池。遙知安置處。預想發榮時。領郡來何遠。還鄉去已遲。莫言千里別。歲晚有心期。

眼病二首

散亂空中千片雪。蒙籠物上一重紗。縱逢晴景如看霧。不是春天亦見花。僧說客塵來眼界。醫言風眩在肝家。兩頭治療何曾差。藥力微茫佛力賒。

又一首

眼臟損傷來已久。病根牢固去應難。醫師盡勸先停酒。道侶多教早罷官。案上讀鋪龍樹論。盒中虛貯決明丸。人間方藥應無益。爭得金篦試刮看。

題東武丘寺六韻

香刹看非遠。祇園入始深。龍蟠松矯矯。玉立竹森森。怪石千僧坐。靈池一劍沉。海當亭兩面。山在寺中心。酒熟憑花勸。詩成倩鳥吟。寄言軒冕客。此地好抽簪。

夜遊西武丘寺八韻

不厭西丘寺。閑來卽一過。舟船轉雲島。樓閣出烟蘿。路入青松影。門臨白月波。魚跳驚秉燭。猿戲怪鳴珂。搖曳雙紅旆。娉婷十翠娥。香花助羅綺。鍾梵避笙歌。領郡時將久。遊山數幾何。一年十二度。非少亦非多。

詠懷

蘇杭自昔稱名郡。牧守當今最好官。兩地江山踢得遍。五年風月詠將殘。幾時酒盞曾拋却。何處花枝不把看。白髮滿頭歸得也。詩情酒興漸闌珊。

重詠

日覺雙眸暗。年驚兩鬢蒼。病應無處避。老更不宜忙。徇俗心情少。休官道理長。今秋歸去定。何必重思量。

百日假滿

心中久有歸田計。身上都無濟世才。長告初從百日滿。故鄉元約一年迴。馬辭轅下頭高舉。鶴出籠中翅大開。但拂衣行莫迴顧。的無官職趁人來。

九日寄微之

眼暗頭風事事妨。遶籬新菊爲誰黃。閑遊日久心慵倦。痛飲年深肺損傷。吳郡兩迴逢九月。越州四度見重陽。怕飛盃酒多分數。厭聽笙歌舊曲章。蟋蟀聲寒初過雨。茱萸色淺未經霜。去秋共數登高會。又被今年減一場。

題報恩寺

好是清涼地。都無繫絆身。晚晴宜野寺。秋景屬閑人。淨石堪敷坐。寒泉可濯巾。自慚容鬢上。獨帶郡庭塵。

晚起

臥聽琴瑟銜鼓聲。起遲睡足長心情。華簪脫後頭雖白。堆案拋來眼校明。閑上籃輿乘興出。醉迴花舫信風行。明朝更濯塵纓去。聞道松江水最清。

自思益寺次楞伽寺作

朝從思益峯遊後。時到楞伽寺歇時。照水姿容雖已老。上山筋力未全衰。行逢禪客多相問。坐倚漁舟一自思。猶去懸車十五載。休官非早亦非遲。

松江亭攜樂觀漁宴宿

震澤平蕪岸。松江落葉波。在官常夢想。爲客始經過。水面排罾網。船頭簇綺羅。朝盤鱸紅鯉。夜燭舞青娥。鴈斷知風急。潮平見月多。繁絲與促管。不解和漁歌。

宿靈巖寺上院

高高白月上青林。客去僧歸獨夜深。葦血屏除唯對酒。歌鐘放散祇留琴。更無俗物當人眼。但有泉聲洗我心。最愛曉亭東望好。太湖煙水綠沉沉。

酬別周從事二首

腰痛拜迎人客倦。眼昏勾押簿書難。辭官歸去緣衰病。莫作陶潛范蠡看。洛下田園久拋擲。吳中歌酒莫留連。嵩陽雲樹伊川月。已校歸遲四五年。

武丘寺路

自開山寺路。水陸往來頻。銀勒牽驕馬。花船載麗人。菱荷生欲徧。桃李種仍新。好住湖堤上。長留一道春。齊雲樓晚望。偶題十韻兼呈馮侍御周殷二協律。

潦倒宦情盡。蕭條芳歲闌。欲辭南國去。重上北城看。複疊江山壯。平鋪井邑寬。人稠過楊府。坊闌半長安。插霧峯頭沒。穿霞日脚殘。水光紅漾漾。樹色綠漫漫。約略留遺愛。殷勤念舊歡。病拋官職易。老別友朋難。九月全無熱。西風亦未寒。齊雲樓北面。半日凭欄杆。

吳宮詞

澹紅花帳淺檀蛾。睡臉初開似翦波。坐對珠籠閑理曲。琵琶鸚鵡語相和。

河亭晴望

風轉雲頭斂。烟銷水面開。晴虹橋影出。秋鴈櫓聲來。郡靜官初罷。鄉遙信未迴。明朝是重九。誰勸菊花盃。

留別微之

干時久與本心違。悟道深知前事非。猶痛勞形辭郡印。那將趁伴著朝衣。五千言裏教知足。三百篇中勸式微。少室雲邊伊水畔。比君校老合先歸。

自喜

自喜天教我少緣。家徒行計兩翩翩。身兼妻子都三口。鶴與琴書共一船。僮僕減來無冗食。資糧算外有餘錢。攜將貯作丘中費。猶免飢寒得數年。

武丘寺路宴留別諸妓

銀泥裙映錦障泥。畫舸停橈馬簇蹄。清管曲終鸚鵡語。紅旗影動駸輪嘶。漸銷醉色朱顏淺。欲語離情翠黛低。莫忘使君吟詠處。女墳湖北虎丘西。

江上對酒二首

酒助疎頑性。琴資緩慢情。有慵將送老。無智可勞生。忽忽忘機坐。佹佹任運行。家鄉安處是。那獨在神京。

又一首

久貯滄浪意。初辭桎梏身。昏昏常帶酒。默默不應人。坐穩便箕踞。眠多愛欠伸。客來存禮數。始著白綸巾。

望亭驛酬別周判官

何事出長洲。連宵飲不休。醒應難作別。歡漸少於愁。燈火穿村市。笙歌上驛樓。何言五十里。已不屬蘇州。

見小姪龜兒詠燈詩并臘娘製衣因寄行簡

已知臘子能裁服。復報龜兒解詠燈。巧婦才人常薄命。莫教男女苦多能。

酒筵上答張居士

但要前塵滅。無妨外相同。雖過酒肆上。不離道場中。絃管聲非實。花鈿色是空。何人知此義。唯有淨名翁。

鸚鵡

隴西鸚鵡到江東。養得經年鬣漸紅。常恐思歸先翦翅。每因餒食暫開籠。人憐巧語情雖重。鳥憶高飛意不同。應似朱門歌舞妓。深藏牢閉後房中。

聽琵琶妓彈略略

腕軟撥頭輕。新教略略成。四絃千遍語。一曲萬重情。法向師邊得。能從意上生。莫欺江外手。別是一家聲。

寫新詩寄微之偶題卷後

寫了吟看滿卷愁。淺紅牋紙小銀鈎。未容寄與微之去。已被人傳到越州。

寶曆二年八月三十日夜夢後作

塵櫻忽解誠堪喜。世網重來未可知。莫忘全吳館中夢。嶺南泥雨步行時。

與夢得同登棲靈塔

半月悠悠在廣陵。何樓何塔不同登。共憐筋力猶堪在。上到棲靈第九層。

夢蘇州水閣寄馮侍御

揚州驛裏夢蘇州。夢到花橋水閣頭。覺後不知馮侍御。此中昨夜共誰遊。

喜罷郡

五年兩郡亦堪嗟。偷出遊山走看花。自此光陰爲己有。從前日月屬官家。樽前免被催迎使。枕上休聞報坐衙。睡到午時歡到夜。迴看官職是泥沙。

答次休上人

姓白使君無麗句。名休座主有新文。禪心不合生分別。莫愛餘霞嫌碧雲。

卷五十五

律詩 凡一百首

感悟妄緣題如上人壁

自從爲騃童。直至作衰翁。所好隨年異。爲忙終日同。弄沙成佛塔。鏤玉謁王宮。彼此皆兒戲。須臾卽色空。有營非了義。無著是真宗。兼恐勤修道。猶應在妄中。

思子臺有感二首

曾家機上聞投杼。尹氏園中見掇蜂。但以恩情生隙罅。何人不解作江充。

關生魍魅生蟲。何異讒生疑阻中。但使武皇心似燭。江充不敢作江充。

賦得邊城角

邊角兩三枝。霜天隴上兒。望鄉相並立。向月一時吹。戰馬頭皆舉。征人手盡垂。鳴鳴三奏罷。城上展旌旗。

憶洛中所居

忽憶東都宅。春來事宛然。雪銷行徑裏。水上臥房前。厭綠栽黃竹。嫌紅種白蓮。醉教鶯送酒。閑遣鶴看船。幸是林園主。慚爲食祿牽。宦情薄似紙。鄉思急於弦。豈合姑蘇守。歸休更待年。

想歸田園

戀他朝市求何事。想取丘園樂此身。千首惡詩吟過日。一壺好酒醉銷春。歸鄉年亦非全老。罷郡家仍未苦貧。快活不知如我者。人間能有幾多人。

琴茶

兀兀寄形羣動內。陶陶任性一生間。自拋官後春多醉。不讀書來老更閑。琴裏知聞唯淥水。茶中故舊是蒙山。窮通行止長相伴。誰道吾今無往還。

贈楚州郭使君

淮水東南第一州。山圍雉堞月當樓。黃金印綬懸腰底。白雪歌詩落筆頭。笑看兒童騎竹馬。醉攜賓客上仙舟。當家美事堆身上。何啻林宗與細侯。

和郭使君題枸杞

山陽太守政嚴明。吏靜人安無犬驚。不知豔藥根成狗。怪得時聞吠夜聲。

初到洛下閑遊

漢庭重少身宜退。洛下閑居迹可逃。趁伴入朝應老醜。尋春放醉尙粗豪。詩攜綵紙新裝卷。酒典緋花舊賜袍。曾在東方千騎上。至今躑躅馬頭高。

醉贈劉二十八使君

爲我引杯添酒飲。與君把筯擊盤歌。詩稱國手徒爲爾。命壓人頭不奈何。舉眼風光長寂寞。滿朝官職獨蹉跎。亦知合被才名折。二十三年折太多。

太湖石

煙翠三秋色。波濤萬古痕。削成青玉片。截斷碧雲根。風氣通巖穴。苔文護洞門。三峯具體小。應是華山孫。

過敷水

垂鞭欲渡羅敷水。處分鳴騶且緩驅。秦氏雙蛾久冥寞。蘇臺五馬尙踟蹰。村童店女仰頭笑。今日使君真是愚。

南院

林院無情緒。經春不一開。楊花飛作穗。榆莢落成堆。壯志從中減。流年逐後催。祇應如過客。病去老迎來。

閑詠

步月憐清景。眠松愛綠陰。早年詩思苦。晚歲道情深。夜學禪多坐。秋牽興暫吟。悠然兩事外。無處更留心。

初授祕監。并賜金紫。閑吟小酌。偶寫所懷。

紫袍新祕監。白首舊書生。鬢雪人間壽。腰金世上榮。子孫無可念。產業不能營。酒引眼前興。詩留身後名。閑傾三數酌。醉詠十餘聲。便是羲皇代。先從心太平。

新昌閑居招楊郎中兄弟

紗巾角枕病閑翁。忙少眠多誰與同。但有雙松當砌下。更無一事到心中。金章紫綬看如夢。皂蓋朱輪別似空。暑月貧家何所有。客來唯贈北窗風。

祕省後廳

槐花雨潤新秋地。桐葉風翻欲夜天。盡日後廳無一事。白頭老監枕書眠。

松齋偶興

置心思慮外。滅跡是非間。約俸爲生計。隨官換往還。耳煩聞曉角。眼醒見秋山。賴此松簷下。朝迴半日閑。和楊郎中賀楊僕射致仕後楊侍郎門生合宴席上作

業重關西繼大名。恩深闕下遂高情。祥鱣降伴趨庭鯉。賀燕飛和出谷鶯。范蠡舟中無子弟。疎家席上欠門生。可憐玉樹連桃李。從古無如此會榮。

松下琴贈客

松寂風初定。琴清夜欲闌。偶因羣動息。試撥一聲看。寡鶴當微怨。秋泉應指寒。慚君此傾聽。本不爲君彈。

秋齋

晨起秋齋冷。蕭條稱病容。清風兩窗竹。白露一庭松。阮籍謀身拙。嵇康向事慵。生涯別有處。浩氣在心胸。
塗山寺獨遊

野徑行無伴。僧房宿有期。塗山來去熟。唯是馬蹄知。

登觀音臺望城

百千家似圍棋局。十二街如種菜畦。遙認微微入朝火。一條星宿五門西。

登靈應臺北望

臨高始見人寰小。對遠方知色界空。迴首却歸朝市去。一梯米落太倉中。

酬裴相公題興化小池見招長句

爲愛小塘招散客。不嫌老監與新詩。山公倒載無妨學。范蠡扁舟未要追。蓬斷偶飄桃李徑。鳴鶯誤拂鳳凰池。敢辭課拙酬高韻。一勺爭禁萬頃陂。

閑行

五十年來思慮熟。忙人應未勝閑人。林園傲逸真成貴。衣食單疎不是貧。專掌圖書無過地。遍尋山水自由身。儻年七十猶強健。尙得閑行十五春。

閑出

兀兀出門何處去。新昌街晚樹陰斜。馬蹄知意緣行熟。不向楊家卽庾家。

與僧智如夜話

懶鈍尤知命。幽棲漸得朋。閉門無謁客。靜室有禪僧。爐向初冬火。籠停半夜燈。憂勞緣智巧。自喜百無能。

憶廬山舊隱及洛下新居

形骸僂俛班行內。骨肉勾留俸祿中。無奈攀緣隨手長。亦知恩愛到頭空。草堂久閉廬山下。竹院新拋洛水東。自是未能歸去得。世間誰要白頭翁。

晚寒

急景流如箭。淒風利似刀。暝催雞翅斂。寒束樹枝高。縮水濃和酒。加絺厚絮袍。可憐冬計畢。煖臥醉陶陶。

偶眠

放盃書案上。枕臂火爐前。老愛尋思事。慵多取次眠。妻教卸烏帽。婢與展青氈。便是屏風樣。何勞畫古賢。

詠

華城西北雉堞最高。崔相公首創樓臺。錢左丞繼種花果。合爲勝境。題在雅篇。歲暮獨遊。悵然成詠。

高居稱君子。瀟灑四無鄰。丞相棟梁久。使君桃李新。凝情看麗句。駐步想清塵。況是寒天客。樓空無主人。

奉使塗中戲贈張常侍

早風吹土滿長衢。駟騎星軺盡疾驅。共笑監舛亦稱使。日馳一驛向東都。

有小白馬。乘馭多時。奉使東行。至稠桑驛。溘然而斃。足可驚傷。不能忘情。題二十韻。

能驟復能馳。翩翩白馬兒。毛寒一團雪。鬃薄萬條絲。皂蓋春行日。驪駒曉從時。雙旌前獨步。五馬內偏騎。芳草承蹄葉。垂楊拂頂枝。跨將迎好客。惜不換妖姬。慢鞦遊蕭寺。閑馴醉習池。睡來乘作夢。興發倚成詩。

鞭爲馴難下。鞍緣穩不離。北歸還共到。東使亦相隨。赭白何曾變。玄黃豈得知。嘶風聲覺急。踏雪怪行遲。昨夜猶葛屨。今朝尙縶維。臥槽應不起。顧主遂長辭。塵滅駸駸跡。霜留皎皎姿。度關形未改。過隙影難追。念倍燕求駿。情深項別騅。銀收鉤臆帶。金卸絡頭羈。何處埋奇骨。誰家覓弊帷。稠桑驛門外。吟罷涕雙垂。

題噴玉泉

泉噴聲如玉。潭澄色似空。練垂清障上。珠寫綠盆中。溜滴三秋雨。寒生六月風。何時此巖下。來作濯纓翁。

酬皇甫賓客

閑官兼慢使。著處易停輪。况欲逢新歲。仍將見故人。冒寒尋到洛。待暖始歸秦。亦擬同攜手。城東略看春。

種白蓮

吳中白藕洛中栽。莫戀江南花懶開。萬里攜歸爾知否。紅蕉朱槿不將來。

答蘇庶子

偶作關東使。重陪洛下遊。病來從斷酒。老去可禁愁。款曲偏青眼。蹉跎各白頭。蓬山閑氣味。依約似龍樓。

答尉遲少監水閣重宴

人情依舊歲華新。今日重招往日賓。雞黍重迴千里駕。林園暗換四年春。水軒平寫琉璃鏡。草岸斜鋪翡翠茵。聞道經營費心力。忍教成後屬他人。

和劉郎中傷鄂姬

不獨君嗟我亦嗟。西風北雪殺南花。不知月夜魂歸處。鸚鵡洲頭第幾家。

贈東鄰王十三

攜手池邊月。開襟竹下風。驅愁知酒力。破睡見茶功。居處東西接。年顏老少同。能來爲伴否。伊上作漁翁。

早春同劉郎中寄宣武令狐相公

梁園不到一年強。遙想清吟對綠觴。更有何人能飲酌。新添幾卷好篇章。馬頭拂柳時迴轡。豹尾穿花暫亞槍。誰引相公開口笑。不逢白監與劉郎。

寄太原李相公

聞道北都今一變。政和軍樂萬人安。綺羅二八圍賓榻。組練三千夾將壇。蟬鬢應誇丞相少。貂裘不覺太原寒。世間大有虛榮貴。百歲無君一日歡。

雪中寄令狐相公兼呈夢得

兔園春雪梁王會。想對金罍詠玉塵。今日相如身在此。不知客右坐何人。出使在途。所騎馬死。改乘肩輿。將歸長安。偶詠旅懷。寄太原李相公。

驛路崎嶇泥雪寒。欲登籃輿一長歎。風光不見桃花騎。塵土空留杏葉鞍。喪乘獨歸殊不易。脫驂相贈豈爲難。并州好馬應無數。不怕旌旄試覓看。

有雙鶴留在洛中。忽見劉郎中。依然鳴顧。劉因爲鶴歎。二篇寄子。予以二絕句答之。

辭鄉遠隔華亭水。逐我來棲縹嶺雲。慚愧稻粱長不飽。未曾迴眼向雞羣。荒草院中池水畔。銜恩不去又經春。見君驚喜雙迴顧。應爲吟聲似主人。

宿竇使君莊水亭

使君何在在江東。池柳初黃杏欲紅。有興卽來閑便宿。不知誰是主人翁。

龍門下作

龍門澗下濯塵纓。擬作閑人過此生。筋力不將諸處用。登山臨水詠詩行。

姚侍御見過戲贈

晚起春寒慵裹頭。客來池上偶同遊。東臺御史多提舉。莫按金章繫布裘。

履道春居

微雨灑園林。新晴好一尋。低風洗池面。斜日拆花心。暝助嵐陰重。春添水色深。不如陶省事。猶抱有絃琴。

題洛中宅

水木誰家宅。門高占地寬。懸魚掛青螯。行馬護朱欄。春榭籠烟煖。秋庭鑱月寒。松膠粘琥珀。筠粉撲琅玕。試問池臺主。多爲將相官。終身不會到。唯展宅圖看。

寄殷協律

五歲優遊同過日。一朝消散似浮雲。琴詩酒伴皆拋我。雪月花時最憶君。幾度聽雞歌白日。亦曾騎馬詠紅裙。吳娘暮雨蕭蕭曲。自別江南更不聞。

洛下諸客就宅相送偶題西亭

几榻臨池坐。軒車冒雪過。交親致杯酒。僮僕解笙歌。流歲行將晚。浮榮得幾多。林泉應問我。不注意如何。

答林泉

好住舊林泉。迴頭一悵然。漸知吾潦倒。深愧爾留連。欲作棲雲計。須營種黍錢。更容求一郡。不得亦歸田。將發洛中。枉令狐相公手札兼辱二篇寵行。以長句答之。

尺素忽驚來梓澤。雙金不惜送蓬山。八行落泊飛雲雨。五字鎗鏃動珮環。玉韻乍聽堪醒酒。銀鈎細讀當披顏。收藏便作終身寶。何啻三年懷袖間。

臨都驛答夢得六言二首

揚子津頭月下。臨都驛裏燈前。昨日老於前日。去年春似今年。謝守歸爲祕監。馮公老作郎官。前事不須問著。新詩且更吟看。

喜錢左丞再除華州以詩伸賀

左轄輟中臺。門東委上才。彤襜經宿到。絳帳及春開。民望懇難奪。天心慈易迴。那知不隔歲。重借寇恂來。

和錢華州題少華清光絕句

高情雅韻三峯守。主領清光管白雲。自笑亦曾爲刺史。蘇州肥膩不如君。

送陝府王大夫

金馬門前迴劍珮。鐵牛城下擁旌旗。他時萬一爲交代。留取甘棠三兩枝。

代迎春花招劉郎中

幸與松筠相近栽。不隨桃李一時開。杏園豈敢妨君去。未有花時且看來。

翫迎春花贈楊郎中

金英翠萼帶春寒。黃色花中有幾般。憑君與向遊人道。莫作蘼菁花眼看。

閑出

身外無羈束。心中少是非。被花留便住。逢酒醉方歸。人事行時少。官曹入日稀。春寒遊正好。穩馬薄綿衣。

座上贈盧判官

把酒承花花落頻。花香酒味相和春。莫言不是江南會。虛白亭中舊主人。

曲江有感

曲江西岸又春風。萬樹花前一老翁。遇酒逢花還且醉。若論惆悵事何窮。

杏園花下贈劉郎中

怪君把酒偏惆悵。曾是貞元花下人。自別花來多少事。東風二十四迴春。

花前有感兼呈崔相公劉郎中

落花如雪鬢如霜。醉把花看益自傷。少日爲名多檢束。長年無興可顛狂。四時輪轉春常少。百刻支分夜苦長。何事同生壬子歲。老於崔相及劉郎。

微之就拜尙書。居易續除刑部。因書賀意。兼詠離懷。

我爲憲部入南宮。君作尙書鎮浙東。老去一時成白首。別來七度換春風。簪纓假合虛名在。筋力銷磨實事空。遠地官高親故少。些些談笑與誰同。

和裴相公水傍絕句

行尋春水坐看山。早出中書晚未還。爲報野僧巖客道。偷閑氣味勝長閑。

喜與韋左丞同入南省因敍舊以贈之

早年同遇陶鈞主。利鈍精麤共在鎔。金劍淬來長透匣。鉛刀磨盡不成鋒。差肩北省慚非據。接武南宮幸再容。跛鼈雖遲騏驥疾。何妨中路亦相逢。

伊州

老去將何散老愁。新教小玉唱伊州。亦應不得多年聽。未教成時已白頭。

早朝

鼓動出新昌。雞鳴赴建章。翩翩穩鞍馬。楚楚健衣裳。宮漏傳殘夜。城陰送早涼。月堤槐露氣。風燭樺烟香。雙闕龍相對。千官雁一行。漢庭方尙少。慚歎鬢如霜。

答裴相公乞鶴

驚露聲音好。冲天相貌殊。終宜向遼廓。不稱在泥塗。白首勞爲伴。朱門幸見呼。不知疎野性。解愛鳳池無。

晚從省歸

朝迴北闕值清晨。晚出南宮送暮春。入去丞郎非散秩。歸來詩酒是閑人。猶思泉石多成夢。尙歎簪裾未離身。終是不如山下去。心頭眼底兩無塵。

北窗閑坐

虛窗兩叢竹。靜室一爐香。門外紅塵合。城中白日忙。無煩尋道士。不要學仙方。自有延年術。心閑歲月長。

酬嚴給事

羸女偷乘風去時。洞中潛歇弄瓊枝。不緣啼鳥春饒舌。青瑣仙郎可得知。

京路

西來爲看秦山雪。東去緣尋洛苑春。來去騰騰兩京路。閉行除我更無人。

華州西

每逢人靜傭多歇。不計程行困卽眠。上得籃輿未能去。春風敷水店門前。

從陝至東京

從陝至東京。山低路漸平。風光四百里。車馬十三程。花共垂鞭看。盃多並轡傾。笙歌與談笑。隨分自將行。

送春

銀花鑿落從君勸。金屑琵琶爲我彈。不獨送春兼送老。更嘗一酌更聽看。

宿杜曲花下

覓得花千樹。攜來酒一壺。懶歸兼擬宿。未醉豈勞扶。但惜春將晚。寧愁日漸晡。籃輿爲臥舍。漆盃是行廚。斑竹盛茶櫃。紅泥卷飯爐。眼前無所闕。身外更何須。小面琵琶婢。蒼頭鬻藥奴。從君飽富貴。曾作此遊無。

逢舊

久別偶相逢。俱疑是夢中。卽今歡樂事。放盞又成空。

繡婦歎

連枝花樣繡羅襪。本擬新年餉小姑。自覺逢春饒悵望。誰能每日趁功夫。針頭不解愁眉給。線縷難穿淚臉珠。雖凭繡牀都不語。同牀繡伴得知無。

春詞

低花樹映小粧樓。春入眉心兩點愁。斜倚欄杆問鸚鵡。思量何事不迴頭。

恨詞

翠黛眉低斂。紅珠淚暗銷。從來恨人意。不省似今朝。

山石榴花十二韻

曄曄復煌煌。花中無比方。豔天宜小院。條短稱低廊。本是山頭物。今爲砌下芳。千叢相向背。萬朵互低昂。照灼連朱檻。玲瓏映粉牆。風來添意態。日出助晶光。漸綻燕脂萼。猶含琴軫房。離披亂翦綵。班駁未勻粧。絳焰燈千炷。紅裙妓一行。此時逢國色。何處覓天香。恐合栽金闕。思將獻玉皇。好差青鳥使。封作百花王。

送敏中歸幽寧幕

六十衰翁兒女悲。傍人應笑爾應知。弟兄垂老相逢日。杯酒臨歡欲散時。前路加飧須努力。今宵盡醉莫推辭。司徒知我難爲別。直過秋歸未訝遲。

宴散

小宴追涼散。平橋步月迴。笙歌歸院落。燈火下樓臺。殘暑蟬催盡。新秋雁帶來。將何迎睡興。臨臥舉殘盃。

人定

人定月朧明。香銷枕簟清。翠屏遮燭影。紅袖下簾聲。坐久吟方罷。眠初夢未成。誰家教鸚鵡。故故語相驚。

池上

嫋嫋涼風動。淒淒寒露零。蘭衰花始白。荷破葉猶青。獨立棲沙鶴。雙飛照水螢。若爲寥落境。仍值酒初醒。

池窗

池晚蓮芳謝。窗秋竹意深。更無人作伴。唯對一張琴。

花酒

香醅淺酌浮如蟻。雲鬢新梳薄似蟬。爲報洛城花酒道。莫辭送老二三年。

題崔常侍濟源莊

谷口誰家住。雲扃鎖竹泉。主人何處去。蘿薜換貂蟬。籍在金閨內。班排玉扆前。誠知憶山水。歸得是何年。

認春戲呈馮少尹李郎中陳主簿

認得春風先到處。西園南面水東頭。柳初變後條猶重。花未開前葉已稠。暗助醉歡尋綠酒。潛添睡興著紅樓。知君未別陽和意。直待春深始擬遊。

春風

春風先發苑中梅。櫻杏桃梨次第開。薺花榆莢深村裏。亦道春風爲我來。

魏堤有懷

魏王堤下水聲似使君灘。惆悵迴頭聽。踟躕立馬看。蕩風波眼急。翻雪浪心寒。憶得瞿唐事。重吟行路難。

柘枝詞

柳暗長廊合。花深小院開。蒼頭鋪錦褥。皓腕捧銀盃。繡帽珠稠綴。香衫袖窄裁。將軍拄毬杖。看按柘枝來。

代夢得吟

後來變化三分貴。同輩凋零大半無。世上爭先從盡汝。人間鬪在不如吾。竿頭已到應難久。局勢雖遲未必輸。不見山苗與林葉。迎春先綠亦先枯。

寄答周協律

故人敍舊寄新篇。惆悵江南到眼前。暗想樓臺萬餘里。不聞歌吹一周年。橋頭誰更看新月。池畔猶應泊舊船。最憶後亭杯酒散。紅屏風掩綠窗眠。

卷五十六

律詩 五言 七言 凡九十九首

大和戊申歲大有年詔賜百寮出城觀稼謹書盛事以俟采詩。

清晨承詔命。豐歲閱田闕。膏雨抽苗足。涼風吐穗初。早禾黃錯落。晚稻綠扶疎。好人詩家詠。宜令史館書。散爲萬姓食。堆作九年儲。莫道如雲稼。今秋雲不如。

贈悼懷太子挽歌辭二首

竹馬書薨歲。銅龍表葬時。永言窳窳事。全用少陽儀。壽夭由天命。哀榮出聖慈。恭聞褒贈詔。軫念在華夷。又一首

剪葉藩封早。承華册命尊。笙歌辭洛苑。風雪蔽梁園。鹵簿凌霜宿。銘旌向月翻。宮寮不逮事。哭送出都門。雨中招張司業宿

過夏衣香潤。迎秋簾色鮮。斜支花石枕。臥詠藥珠篇。泥濘非遊日。陰沉好睡天。能來同宿否。聽雨對牀眠。

和集賢劉學士早朝作

吟君昨日早朝詩。金御爐前喚仗時。煙吐白龍頭宛轉。扇開青雉尾參差。暫留春殿多稱屈。合入綸闈卽可知。從此摩霄去。非晚鬢間未有一莖絲。

送陝州王司馬建赴任

陝州司馬去何如。養靜資貧兩有餘。公事閑忙同少尹。料錢多少敵尙書。祇攜美酒爲行伴。唯作新詩趁下車。自有鐵牛無詠者。料君投刃必應虛。

對琴待月

竹院新晴夜。松窗未臥時。共琴爲老伴。與月有秋期。玉軫臨風久。金波出霧遲。幽音待清景。唯是我心知。

楊家南亭

小亭門向月斜開。滿地涼風滿地苔。此院好彈秋思處。終須一夜抱琴來。

早寒

黃葉聚牆角。青苔圍柱根。被經霜後薄。鏡遇雨來昏。半卷寒簷幕。斜開煖閣門。迎冬兼送老。祇仰酒盈樽。

齋月靜居

病來心靜一無思。老去身閑百不爲。忽忽眼塵猶愛睡。些些口業尙誇詩。葷腥每斷齋居月。香火常親宴坐時。萬慮消停百神泰。唯應寂寞殺三尸。

宿裴相公興化池亭

林亭一出宿風塵。忘却平津是要津。松閣晴看山色近。石渠秋放水聲新。孫弘閣闕無閑客。傅說舟忙不借人。何似榆村濟川外。別開池館待交親。

和劉郎中望終南山秋雪

遍覽古今集。都無秋雪詩。陽春先唱後。陰嶺未消時。草訝霜凝重。松疑鶴散遲。清光莫獨占。亦對白雲司。

廣府胡尚書頻寄詩因答絕句

尚書清白臨南海。雖飲貪泉心不回。唯向詩中得珠玉。時時寄到帝鄉來。

送鶴與裴相臨別贈詩

司空愛爾爾須知。不信聽吟送鶴詩。羽翮勢高寧惜別。稻粱恩厚莫愁飢。夜棲少共雞爭樹。曉浴先饒鳳占池。穩上青雲勿迴顧。的應勝在白家時。

令狐相公拜尚書後有喜從鎮歸朝之作劉郎中先和因以繼之

車騎從新梁苑迴。履聲珮響入中臺。鳳池望在終重去。龍節功成且納來。金勒最宜乘雪出。玉觴何必待

花開尙書首唱。郎中和。不計官資祇計才。

送河南尹馮學士赴任

石渠金谷中間路。軒騎翩翩十日程。清洛飲冰添苦節。碧嵩看雪助高情。謾誇河北操旄鉞。莫羨江西擁旆旌。何似府寮京令外。別教三十六峯迎。

讀鄂公傳

高臥深居不見人。功名斗數似灰塵。唯留一部清商樂。月下風前伴老身。

賦得烏夜啼

城上歸時晚。庭前宿處危。月明無葉樹。霜滑有風枝。啼澀飢喉咽。飛低凍翅垂。畫堂鸚鵡鳥。冷暖不相知。

鏡換盃

欲將珠匣青銅鏡。換取金樽白玉卮。鏡裏老來無避處。樽前愁至有消時。茶能散悶爲功淺。萱縱忘憂得力遲。不似杜康神用速。纔分一盞便開眉。

冬夜聞蟲

蟲聲冬思苦於秋。不解愁人聞亦愁。我是老翁聞不畏。少年莫聽白君頭。

雙鸚鵡

綠衣整頓雙棲起。紅嘴分明對語時。始覺琵琶絃莽鹵。方知吉了舌參差。鄭牛識字吾常歎。丁鶴能歌爾亦知。若稱白家鸚鵡鳥。籠中兼合解吟詩。

贈朱道士

儀容白皙上仙郎。方寸清虛內道場。兩翼化生因服藥。三尸餓死爲休糧。醮壇北向宵占斗。寢室東開早納陽。盡日窗間更無事。唯燒一炷降真香。

昨以拙詩十首寄西川杜相公。相公亦以新作十首惠然報示。首數雖等。工拙不倫。重以一章用伸答謝。

詩家律手在城都。權與尋常將相殊。剪截五言兼用鉞。陶鈞六義別開鑪。驚人卷軸須知有。隨事文章不道無。篇數雖同光價異。十魚目換十驪珠。

和令狐相公新於郡內栽竹百竿。拆壁開軒。旦夕對翫。偶題七言五韻。

梁園脩竹舊傳名。久廢年深竹不生。千畝荒涼尋未得。百竿青翠種新成。牆開乍見重添興。窗靜時聞別有情。煙葉蒙籠侵夜色。風枝蕭颯欲秋聲。更登樓望尤堪重。千萬人家無一莖。

重答汝州李六使君見和憶吳中舊遊五韻

爲憶娃宮與虎丘。翫君新作不能休。蜀牋寫出篇篇好。吳調吟時句句愁。洛下林園終共住。江南風月會重遊。由來事過多堪惜。何況蘇州勝汝州。

見殷堯藩侍御憶江南詩三十首。詩中多敍蘇杭。余嘗典二郡。因繼和之。

江南名郡數蘇杭。寫在殷家三十章。君是旅人猶苦憶。我爲刺史更難忘。境牽吟詠真詩國。興入笙歌好醉鄉。爲念舊遊終一去。扁舟直擬到滄浪。

聞新蟬贈劉二十八

蟬發一聲時。槐花帶雨枝。祇應催我老。兼遣報君知。白髮生頭速。青雲入手遲。無過一盃酒。相勸數開眉。

贈王山人

玉芝^神裏王居士。服氣煖霞善養身。夜後不聞龜喘息。秋來唯長鶴精神。容顏盡怪長如故。名姓多疑不是真。貴重榮華輕壽命。知君悶見世間人。

和劉郎中學士題集賢閣

朱閣青山高庫齊。與君才子作詩題。傍聞大內笙歌近。下視諸司屋舍低。萬卷圖書天祿上。一條風景月華西。欲知丞相優賢意。百步新廊不踏泥。

觀幻

有起皆因滅。無睽不暫同。從歡終作感。轉苦又成空。次第花生眼。須臾燭過風。更無尋覓處。鳥跡印空中。

病假中胤少尹攜魚酒相過

宦情牢落年將暮。病假聯綿日漸深。被老相催雖白首。與春無分未甘心。閑停茶碗從容語。醉把花枝取次吟。勞動故人龐閣老。提魚攜酒遠相尋。

聽田順兒歌

夏玉敲冰聲未停。嫌雲不遇入青冥。爭得黃金滿衫袖。一時拋與斷年聽。

聽曹剛琵琶兼示重蓮

撥撥絃絃意不同。胡啼番語兩玲瓏。誰能截得曹剛手。插向重蓮衣袖中。

酬令狐相公春日尋花見寄六韻

病臥帝王州。花時不得遊。老應隨日至。春肯爲人留。粉壞杏將謝。火繁桃尙稠。白飄僧院地。紅落酒家樓。空裏雪相似。晚來風不休。吟君悵望句。如到曲江頭。

和劉郎中曲江春望見示

芳景多遊客。衰翁獨在家。肺傷妨飲酒。眼痛忌看花。寺路隨江曲。宮牆夾樹斜。羨君猶壯健。不枉度年華。

送東都留守令狐尙書赴任

翠華黃屋未東巡。碧洛青蒿付大臣。地稱高情多水竹。山宜閑望少風塵。龍門卽擬爲遊客。金谷先憑作主人。歌酒家家花處處。莫空管領上陽春。

自題新昌居止因招楊郎中小飲

地偏坊遠巷仍斜。最近東頭是白家。宿雨長齊鄰舍柳。晴光照出夾城花。春風小棹三升酒。寒食深爐一椀茶。能到南園同醉否。笙歌隨分有些些。

南園試小樂

小園斑駁花初發。新樂錚鏦教欲成。紅萼紫房皆手植。蒼頭碧玉盡家生。高調管色吹銀字。慢拽歌詞唱渭城。不飲一盃聽一曲。將何安慰老心情。

和微之春日投簡陽明洞天五十韻

青陽行已半。白日坐將徂。越國強仍大。稽城高且孤。利饒鹽煮海。名勝水澄湖。牛斗天垂象。台明地展圖。
瓊奇殖市井。佳麗盜闖閩。勾踐遺風霸。西施舊俗姝。船頭龍天矯。橋脚獸睢盱。鄉味珍蜚蚶。時鮮貴鷓鴣。
語言諸夏異。衣服一方殊。搗練蛾眉婢。鳴榔娃角奴。江清敵伊洛。山翠勝荆巫。華表雙棲鶴。聯牆幾點烏。
煙波分渡口。雲樹接城隅。澗遠松如畫。洲平水似鋪。綠秧科早稻。紫筍拆新蘆。暖踏泥中藕。香尋石上蒲。
雨來萌盡達。雷後蟄全蘇。柳眼黃絲纈。花房絳蠟珠。林風新竹折。野燒老桑枯。帶鞞長枝蕙。錢穿短貫榆。
暄和生野菜。卑溼長街蕪。女浣紗相伴。兒烹鯉一呼。山魈啼稚子。林狖挂山都。產業論蠶蟻。孳生計鴨鵪。
泉巖雪飄灑。苔壁錦漫糊。堰限舟航路。堤通車馬途。耶溪岸迴合。禹廟徑盤紆。洞穴何因鑿。星槎誰與刳。
石凹仙藥臼。峯峭佛香爐。去爲投金簡。來因挈玉壺。貴仍招客宿。健未要人扶。聞望賢丞相。儀形美丈夫。
前驅駐旌旆。偏坐列笙竽。刺史旗翻傘。尙書履曳屨。學禪超後有。觀妙造虛無。髻裏傳僧寶。環中得道樞。
登樓詩八詠。置硯賦三都。捧擁羅將綺。趨躡紫與朱。廟謀藏稷高。兵略貯孫吳。令下三軍整。風高四海趨。
千家得慈母。六郡事嚴姑。重士過三哺。輕才抵一銖。送觥歌宛轉。嘲妓笑盧胡。佐飲時炮鼈。獨醒數餚鱸。
醉鄉雖咫尺。樂事亦須臾。若不中賢聖。何由外智愚。伊予一生志。我爾百年軀。江上三千里。城中十二衢。
出多無伴侶。歸只對妻孥。白首青山約。抽身去得無。

酬鄭侍御多雨春空過詩三十韻

南雨來多滯。東風動卽狂。月行離畢急。龍走召雲忙。鬼轉雷車響。蛇騰電策光。侵淫天似漏。沮洳地成瘡。
慘澹陰煙白。空濛宿霧黃。闇遮千里目。悶結九迴腸。寂寞羈臣館。深沉思婦房。鏡昏鸞滅影。衣潤麝消香。

蘭溼難組珮。花凋易落粧。沾黃鶯翅重。滋綠草心長。紫陌皆泥濘。黃污共森茫。恐霖成怪沴。望霽劇禎祥。
楚柳腰肢鞞。湘筠涕淚滂。晝昏疑是夜。陰盛勝於陽。居士巾皆墊。行人蓋盡張。跳蛙還屢出。移蟻欲深藏。
端坐交遊廢。閑行去步妨。愁生垂白叟。惱殺踏青娘。變海常須慮。爲魚慎勿忘。此時方共懼。何處可相將。
已望東溟禱。仍封北戶穰。却思逢早魃。誰喜見商羊。預怕爲蠹病。先憂作麥霜。惠應施浹洽。政豈假揄揚。
祀典脩咸秩。農書振滿牀。丹誠期懇苦。白日會昭彰。賑廩開飢戶。苦城備壞牆。且當營歲事。寧假惜年芳。
德勝令災弭。人安在吏良。尙書心若此。不枉繫金章。

和春深二十首

何處春深好。春深富貴家。馬爲中路烏。妓作後庭花。羅綺驅論隊。金銀用斷車。眼前何所苦。唯苦日西斜。

又一首

何處春深好。春深貧賤家。荒涼三逕草。冷落四鄰花。奴困歸傭力。妻愁出貨車。途窮平路險。舉足劇褒斜。

又一首

何處春深好。春深執政家。鳳池添硯水。雞樹落花衣。詔借當衢宅。恩容上殿車。延英開對久。門與日西斜。

又一首

何處春深好。春深方鎮家。通犀排帶胯。瑞鶴勸袍花。飛絮衝毬馬。垂楊拂妓車。戎裝拜春殿。左握寶刀斜。

又一首

何處春深好。春深刺史家。陰繁棠布葉。岐秀麥分花。五匹鳴珂馬。雙輪畫戟車。和風引行樂。葉葉隼旗斜。

又一首

何處春深好。春深學士家。鳳書裁五色。馬鬣剪三花。蠟炬開明火。銀臺賜物車。相逢不敢揖。彼此帽低斜。

又一首

何處春深好。春深女學家。慣看溫室樹。飽識浴堂花。御印提隨仗。香牋把下車。宋家宮樣髻。一片綠雲斜。

又一首

何處春深好。春深御史家。絮縈驄馬尾。蝶繞繡衣花。破柱行持斧。埋輪立駐車。入班遙認得。魚貫一行斜。

又一首

何處春深好。春深遷客家。一杯寒食酒。萬里故園花。炎瘴蒸如火。光陰走似車。爲憂鵬鳥至。祇恐日光斜。

又一首

何處春深好。春深經業家。唯求太常第。不管曲江花。折桂名慚郤。收螢志慕車。官場泥補處。最怕寸陰斜。

又一首

何處春深好。春深隱士家。野衣裁薜葉。山飯曬松花。蘭索紐幽珮。蒲輪駐軟車。林間箕踞坐。白眼向人斜。

又一首

何處春深好。春深漁父家。松灣隨棹月。桃浦落船花。投餌移輕楫。牽綸轉小車。蕭蕭蘆葉裏。風起釣絲斜。

又一首

何處春深好。春深潮戶家。濤翻三月雪。浪噴四時花。曳練馳千馬。驚雷走萬車。餘波落何處。江轉富陽斜。

又一首

何處春深好。春深痛飲家。十分盃裏物。五色眼前花。鋪歡眠槽甕。流涎見麴車。中山一沉醉。千度日西斜。

又一首

何處春深好。春深上已家。蘭亭席上酒。曲洛岸邊花。弄水游童棹。湔裾小婦車。齊橈爭渡處。一匹錦標斜。

又一首

何處春深好。春深寒食家。玲瓏鏤雞子。宛轉綵毵花。碧草追遊騎。紅塵拜掃車。鞦韆細腰女。搖曳逐風斜。

又一首

何處春深好。春深博奕家。一先爭破眼。六聚鬪成花。鼓應投壺馬。兵衝象戲車。彈碁局上事。最妙是長斜。

又一首

何處春深好。春深嫁女家。紫排襪上雉。黃帖鬢邊花。轉燭初移障。鳴環欲上車。青衣傳氎褥。錦繡一條斜。

又一首

何處春深好。春深娶婦家。兩行籠裏燭。一對扇間花。賓拜登華席。親迎障幃車。催粧詩未了。星斗漸傾斜。

又一首

何處春深好。春深妓女家。眉欺楊柳葉。裙妬石榴花。蘭麝熏行被。金銅釘坐車。揚州蘇小小。人道最天斜。

詠家醞十韻

獨醒從古笑靈均。長醉如今數伯倫。舊法依傳自杜。新方要妙得於陳。井泉王相資重九。麴蘖精靈用。

上寅釀糯豈勞吹范黍。撇芻何假漉陶巾。常嫌竹葉猶凡濁。始覺榴花不正真。甕揭聞時香酷烈。餅封貯後味甘辛。捧疑明水從空化。飲似陽和滿腹春。色洞玉壺無表裏。光搖金盞有精神。能銷忙事成閑事。轉得憂人作樂人。應是世間賢聖物。與君還往擬終身。

池鶴二首

高竹籠前無伴侶。亂雞羣裏有風標。低頭乍恐丹砂落。曬翅常疑白雪銷。轉覺鷓鴣毛色下。苦嫌鸚鵡語聲嬌。臨風一嘆思何事。悵望青田雲水遙。

池中此鶴鶴中稀。恐是遼東老令威。帶雪松枝翹膝脛。放花菱片綴毛衣。低徊且向籠間宿。奮迅終須天外飛。若問故巢知處在。主人相戀未能歸。

對酒五首

巧拙賢愚相是非。何如一醉盡忘機。君知天地中寬窄。鵬鷃鸞鳳各自飛。

蝸牛角上爭何事。石火光中寄此身。隨富隨貧且歡樂。不開口笑是癡人。

丹砂見火去無迹。白髮詆人來不休。賴有酒仙相煖熱。松喬醉卽到前頭。

百歲無多時壯健。一春能幾日清明。相逢且莫推辭醉。聽唱陽關第四聲。

昨日低眉問疾來。今朝收淚弔人迴。眼前流例君看取。且遣琵琶送一杯。

僧院花

欲悟色空爲佛事。故栽芳樹在僧家。細看便是華嚴偈。方便風開智慧花。

老戒

我有白頭戒。聞於韓侍郎。老多憂活計。病更戀班行。矍鑠誇身健。周遮說話長。不知吾免否。兩鬢已成霜。

洛橋寒食日作十韻

上苑風烟好。中橋道路平。蹴毬塵不起。潑火雨新晴。宿醉頭仍重。晨遊眼乍明。老慵雖省事。春誘尚多情。遇客踟躕立。尋花取次行。連錢嚼金勒。鑿落寫銀罍。府醞常教送。官娃豈要迎。舞腰那及柳。歌舌不如鶯。鄉國真堪戀。光陰可合輕。三年遇寒食。盡在洛陽城。

快活

可惜鶯啼落花處。一壺濁酒送殘春。可憐月好風涼夜。一部清商伴老身。飽食安眠消日月。閑談冷笑接交親。誰知將相王侯外。別有優游快活人。

送令狐相公赴太原

六纛雙旌萬鐵衣。并汾舊路滿光輝。青衫書記何年去。紅旆將軍昨日歸。詩作馬蹄隨筆走。獵酣鷹翅伴鶩飛。北都莫作多時計。再爲蒼生入紫微。

不出

簷前新葉覆殘花。席上餘盃對早茶。好是老郎銷日處。誰能騎馬傍人家。

惜落花

夜來風雨急。無復舊花林。枝上三分落。園中一寸深。日斜啼鳥思。春盡老人心。莫怪添杯飲。情多酒不禁。

老病

晝聽笙歌夜醉眠。若非月下卽花前。如今老病須知分。不負春來二十年。

憶晦叔

遊山弄水攜詩卷。看月尋花把酒杯。六事盡思君作伴。幾時歸到洛陽來。

送徐州高僕射赴鎮

大紅旆引碧幢旌。新拜將軍指點行。戰將易求何足貴。書生難得始堪榮。離筵歌舞花叢散。候騎刀槍雪隊迎。應笑蹉跎白頭尹。風塵唯管洛陽城。

琴酒

耳根得所琴初暢。心地忘機酒半酣。若使啓期兼解醉。應言四樂不言三。

聽幽蘭

琴中古曲是幽蘭。爲我慙慙更弄看。欲得身心俱靜好。自彈不及聽人彈。

六年秋重題白蓮

素房含露玉冠鮮。紺葉搖風細扇圓。本是吳州供進藕。今爲伊水寄生蓮。移根到此三千里。結子經今六七年。不獨池中花故舊。兼乘舊日採花船。

元相公挽歌詞三首

銘旌官重威儀盛。騎吹聲繁鹵簿長。後魏帝孫唐宰相。六年七月葬咸陽。

墓門已閉笳簫去。唯有夫人哭不休。蒼蒼露草咸陽壠。此是千秋第一秋。
送葬萬人皆慘澹。反虞駟馬亦悲鳴。琴書劍珮誰收拾。三歲遺孤新學行。

臥聽法曲霓裳

金磬玉笙和已久。牙牀角枕睡常遲。朦朧閑夢初成後。宛轉柔聲入破時。
樂可理心應不謬。酒能陶性信無疑。起鶯殘酌聽餘曲。斜背銀缸半下帷。

結之

歡愛今何在。悲啼亦是空。同爲一夜夢。共過十年中。

五鳳樓晚望 六年八月十日作

晴陽晚照溼烟銷。五鳳樓高天次寥。野綠全經朝雨洗。林紅半被暮雲燒。
龍門翠黛眉相對。伊水黃金線一條。自入秋來風景好。就中最好是今朝。

寄劉蘇州

去年八月哭微之。今年八月哭敦詩。何堪老淚交流日。多是秋風搖落時。
泣罷幾迴深自念。情來一倍苦相思。同年同病同心事。除却蘇州更是誰。

送客

病上籃輿相送來。衰容秋思兩悠哉。涼風嫋嫋吹槐子。却請行人勸一盃。

秋思

夕照紅於燒。晴空碧勝藍。獸形雲不一。弓勢月初三。雁思來天北。砧愁滿水南。蕭條秋氣味。未老已深諳。
酬夢得秋夕不寐見寄

碧簾絳紗帳。夜涼風景清。病聞和藥氣。渴聽碾茶聲。露竹偷燈影。烟松護月明。何言千里隔。秋思一時生。
題周家歌者

清緊如敲玉。深圓似轉簧。一聲腸一斷。能有幾多腸。

憶夢得

齒髮各蹉跎。疎慵與病和。愛花心在否。見酒興如何。年長風情少。官高俗慮多。幾時紅燭下。閒唱竹枝歌。

贈同座

春黛雙蛾嫩。秋蓬兩鬢侵。謀歡身太晚。恨老意彌深。薄解燈前舞。尤能酒後吟。花叢便不入。猶自味甘心。

失婢

宅院小牆庫。坊門帖榜遲。舊恩慚自薄。前事悔難追。籠鳥無常主。風花不戀枝。今宵在何處。唯有月明知。

夜招晦叔

庭草留霜池結冰。黃昏鐘絕凍雲凝。碧氈帳上正飄雪。紅火爐前初炷燈。高調秦箏一兩弄。小花蠻榼二三升。爲君更奏湘靈曲。夜就儂來能不能。

戲答皇甫監

寒宵勸酒君須飲。君是孤眠七十身。莫道非人身不煖。十分一盞煖於人。

和楊師臯傷小姬英英

自從嬌駿一相依。共見楊花七度飛。玳瑁牀空收枕席。琵琶絃斷倚屏幃。人間有夢何曾入。泉下無家豈是歸。墳上少啼留取淚。明年寒食更沾衣。

池邊卽事

氈帳胡琴出塞曲。蘭塘越棹弄潮聲。何言此處同風月。薊北江南萬里情。

聞樂感鄰

老去親朋零落盡。秋來絃管感傷多。尚書宅中悲鄰笛。廷尉門前歎雀羅。綠綺窗空分妓女。絳紗帳掩罷笙歌。歡娛未足身先去。爭奈書生薄命何。